

1 Tawārikh

Ādam se Ibrāhīm tak kā Nasabnāmā

¹ Nūh tak Ādam kī aulād Set, Anūs, ² Qīnān, Mahalalel, Yārid, ³ Hanūk, Matūsilah, Lamak, ⁴ aur Nūh thī.

Nūh ke tīn beṭe Sim, Hām aur Yāfat the. ⁵ Yāfat ke beṭe Jumar, Mājūj, Mādī, Yāwān, Tūbal, Masak aur Tīrās the. ⁶ Jumar ke beṭe Ashkanāz, Rīfat aur Tujarmā the. ⁷ Yāwān ke beṭe Ilīsā aur Tarsīs the. Kittī aur Rodānī bhī us kī aulād haiñ.

⁸ Hām ke beṭe Kūsh, Misr, Fūt aur Kanān the. ⁹ Kūsh ke beṭe Sibā, Hawīlā, Sabtā, Rāmā aur Sabtakā the. Rāmā ke beṭe Sabā aur Dadān the. ¹⁰ Namrūd bhī Kūsh kā betā thā. Wuh zamīn par pahlā sūrmā thā. ¹¹ Misr zail kī qaumōn kā bāp thā: Lūdī, Anāmī, Lihābī, Naftūhī, ¹² Fatrūsī, Kaslūhī (jin se Filistī nikle) aur Kaftūrī. ¹³ Kanān kā pahlaujhā Saidā thā. Kanān in qaumōn kā bāp bhī thā: Hittī ¹⁴ Yabūsī, Amorī, Jirjāsī, ¹⁵ Hiwwī, Arqī, Sīnī, ¹⁶ Arwādī, Samārī aur Hamātī.

¹⁷ Sim ke beṭe Ailām, Asūr, Arfaksad, Lūd aur Arām the. Arām ke beṭe Ūz, Hūl, Jatar aur Masak the. ¹⁸ Arfaksad kā betā Silah aur Silah kā betā Ibar thā. ¹⁹ Ibar ke do beṭe paidā hue. Ek kā nām Falaj yānī Taqsīm thā, kyoñki un aiyām meñ duniyā taqsīm huī. Falaj ke bhāī kā nām Yuqtān thā. ²⁰ Yuqtān ke beṭe Almūdād, Salaf, Hasarmāwat, Irākh, ²¹ Hadūrām, Ūzāl,

Diqlā, ²² Úbāl, Abīmāel, Sabā, ²³ Ofīr, Hawīlā aur Yūbāb the. Yih sab us ke bete the.

²⁴ Sim kā yih nasabnāmā hai: Sim, Arfaksad, Silah, ²⁵ Ibar, Falaj, Raū, ²⁶ Sarūj, Nahūr, Tārah ²⁷ aur Abrām yānī Ibrāhīm.

Ibrāhīm kā Nasabnāmā

²⁸ Ibrāhīm ke bete Is'hāq aur Ismāīl the. ²⁹ Un kī darj-e-zail aulād thī:

Ismāīl kā pahlauṭhā Nabāyot thā. Us ke bāqī bete Qīdār, Adbiyel, Mibṣām, ³⁰ Mishmā, Dūmā, Massā, Hadad, Taimā, ³¹ Yatūr, Nafīs aur Qidmā the. Sab Ismāīl ke hān paidā hue.

³² Ibrāhīm kī dāshtā Qatūrā ke bete Zimrān, Yuqsān, Midān, Midiyān, Isbāq aur Sūkh the. Yuqsān ke do bete Sabā aur Dadān paidā hue ³³ jabki Midiyān ke bete Aifā, Ifar, Hanūk, Abīdā aur Ilda'ā the. Sab Qatūrā kī aulād the.

³⁴ Ibrāhīm ke bete Is'hāq ke do bete paidā hue, Esau aur Isrāīl. ³⁵ Esau ke bete Ilīfaz, Raūel, Yaūs, Yālām aur Qorah the. ³⁶ Ilīfaz ke bete Temān, Omar, Safī, Jātām, Qanaz aur Amālīq the. Amālīq kī mān Timnā thī. ³⁷ Raūel ke bete Nahat, Zārah, Sammā aur Mizzā the.

Saīr Yānī Adom kā Nasabnāmā

³⁸ Saīr ke bete Lotān, Sobal, Sibaon, Anā, Dīson, Esar aur Dīsān the. ³⁹ Lotān ke do bete Horī aur Homām the. (Timnā Lotān kī bahan thī.) ⁴⁰ Sobal ke bete Alyān, Mānahat, Aibāl, Safī aur Onām the. Sibaon ke bete Aiyāh aur Anā the. ⁴¹ Anā ke ek betā Dīson paidā huā. Dīson ke chār bete Hamrān, Ishbān, Yitrān aur Kirān the.

42 Esar ke tīn betē Bilhān, Zāwān aur Aqān the. Dīsān ke do betē Ūz aur Arān the.

Adom ke Bādshāh

43 Is se pahle ki Isrāiliyon kā koī bādshāh thā zail ke bādshāh yake bād dīgare Mulk-e-Adom men hukūmat karte the: Bālā bin Baor jo Dinhābā Shahr kā thā.

44 Us kī maut par Yūbāb bin Zārah jo Busrā Shahr kā thā.

45 Us kī maut par Hushām jo Temāniyon ke mulk kā thā.

46 Us kī maut par Hadad bin Bidad jis ne Mulk-e-Moāb men Midiyāniyon ko shikast dī. Wuh Awīt Shahr kā thā.

47 Us kī maut par Samlā jo Masriqā Shahr kā thā.

48 Us kī maut par Sāūl jo Dariyā-e-Furāt par Rahobot Shahr kā thā.

49 Us kī maut par Bāl-hanān bin Akbor.

50 Us kī maut par Hadad jo Fāū Shahr kā thā. (Bīwī kā nām Mahetabel bint Matrid bint Mezāhāb thā.) **51** Phir Hadad mar gayā.

Adomī qabīloṇ ke sardār Timnā, Alyā, Yatet, **52** Uhlībāmā, Ailā, Fīnon, **53** Qanaz, Temān, Mibsār, **54** Majdiyel aur Irām the. Yihī Adom ke sardār the.

2

Yāqūb Yānī Isrāīl ke Beṭe

1 Isrāīl ke bārah betē Rūbin, Shamāūn, Lāwī, Yahūdāh, Ishkār, Zabūlūn, **2** Dān, Yūsuf, Binyamīn, Naftālī, Jad aur Āshar the.

Yahūdāh kā Nasabnāmā

³ Yahūdāh kī shādī Kanānī aurat se huī jo Sua kī betī thī. Un ke tīn betē Er, Onān aur Selā paidā hue. Yahūdāh kā pahlauṭhā Er Rab ke nazdik sharīr thā, is lie us ne use marne diyā. ⁴ Yahūdāh ke mazīd do betē us kī bahū Tamr se paidā hue. Un ke nām Fāras aur Zārah the. Yoñ Yahūdāh ke kul pāñch betē the.

⁵ Fāras ke do betē Hasron aur Hamūl the.

⁶ Zārah ke pāñch betē Zimrī, Aitān, Haimān, Kalkūl aur Dārā the. ⁷ Karmī bin Zimrī kā betā wuhī Akar yānī Akan thā jis ne us lūte hue māl meñ se kuchh liyā jo Rab ke lie makhsūs thā. ⁸ Aitān ke betē kā nām Azariyāh thā.

⁹ Hasron ke tīn betē Yarahmiyel, Rām aur Kalūbī yānī Kālib the.

Rām kī Aulād

¹⁰ Rām ke hān Ammīnadāb aur Ammīnadāb ke hān Yahūdāh ke qabile kā sardār Nahson paidā huā. ¹¹ Nahson Salmon kā aur Salmon Boaz kā bāp thā. ¹² Boaz Obed kā aur Obed Yassī kā bāp thā. ¹³ Barē se le kar chhoṭe tak Yassī ke betē Iliyāb, Abīnadāb, Simā, ¹⁴ Nataniyel, Raddī, ¹⁵ Ozam aur Dāūd the. Kul sāt bhāī the. ¹⁶ Un kī do bahnen Zarūyāh aur Abījel thīn. Zarūyāh ke tīn betē Abīshai, Yoāb aur Asāhel the. ¹⁷ Abījel ke ek betā Amāsā paidā huā. Bāp Yatar Ismāīlī thā.

Kālib kī Aulād

¹⁸ Kālib bin Hasron kī bīwī Azūbā ke hān betī banām Yarīot paidā huī. Yarīot ke betē Yashar, Sobāb aur Ardūn the. ¹⁹ Azūbā ke wafāt pāne par Kālib ne Ifrāt se shādī kī. Un ke betā Hūr

paidā huā. ²⁰ Hūr Ūrī kā aur Ūrī Bazliyel kā bāp thā.

²¹ 60 sāl kī umr meñ Kālib ke bāp Hasron ne dubārā shādī kī. Bīwī Jiliyād ke bāp Makīr kī betī thī. Is rishte se betā Sajūb paidā huā. ²²⁻²³ Sajūb kā betā wuh Yāīr thā jis kī Jiliyād ke ilāqe meñ 23 bastiyān banām ‘Yāīr kī Bastiyān’ thīn. Lekin bād meñ Jasūr aur Shām ke faujiyon ne un par qabzā kar liyā. Us waqt unheñ Qanāt bhī gird-o-nawāh ke ilāqe samet hāsil huā. Un dinoñ meñ kul 60 ābādiyān un ke hāth meñ ā gaīn. In ke tamām bāshinde Jiliyād ke bāp Makīr kī aulād the. ²⁴ Hasron jis kī bīwī Abiyāh thī faut huā to Kālib aur Ifrātā ke hān betā Ashhūr paidā huā. Bād meñ Ashhūr Taqua Shahr kā bānī ban gayā.

Yarahmiyel kī Aulād

²⁵ Hasron ke pahlauṭhe Yarahmiyel ke bete bare se le kar chhoṭe tak Rām, Būnā, Oran, Ozam aur Akhiyāh the. ²⁶ Yarahmiyel kī dūsrī bīwī Atārā kā ek betā Onām thā.

²⁷ Yarahmiyel ke pahlauṭhe Rām ke bete Māz, Yamīn aur Eqar the. ²⁸ Onām ke do bete Sammī aur Yadā the. Sammī ke do bete Nadab aur Abīsūr the. ²⁹ Abīsūr kī bīwī Abīkhail ke do bete Akhbān aur Molid paidā hue. ³⁰ Nadab ke do bete Silad aur Affāym the. Silad beaulād mar gayā, ³¹ lekin Affāym ke hān betā Yisāi paidā huā. Yisāi Sīsān kā aur Sīsān Akhlī kā bāp thā. ³² Sammī ke bhāi Yadā ke do bete Yatar aur Yūnatan the. Yatar beaulād mar gayā, ³³ lekin Yūnatan ke do bete Falat aur Zāzā paidā hue. Sab Yarahmiyel kī aulād the. ³⁴⁻³⁵ Sīsān ke bete nahīn the balki betiyān. Ek

beṭī kī shādī us ne apne Misrī ghulām Yarkhā se karwāī. Un ke beṭā Attī paidā huā.³⁶ Attī ke hān Nātan paidā huā aur Nātan ke Zabad,³⁷ Zabad ke Iflāl, Iflāl ke Obed,³⁸ Obed ke Yāhū, Yāhū ke Azariyāh,³⁹ Azariyāh ke Khalis, Khalis ke Iliyāsā,⁴⁰ Iliyāsā ke Sismī, Sismī ke Sallūm,⁴¹ Sallūm ke Yaqamiyāh aur Yaqamiyāh ke Ilīsamā.

Kālib kī Aulād kā Ek aur Nasabnāmā

⁴² Zail meṇ Yarahmiyel ke bhāī Kālib kī aulād hai: Us kā pahlauṭhā Mesā Zif kā bāp thā aur dūsrā beṭā Maresā Habrūn kā bāp.⁴³ Habrūn ke chār beṭe Qorah, Taffuah, Raqam aur Samā the.⁴⁴ Samā ke beṭe Rakham ke hān Yurqiyām paidā huā. Raqam Sammī kā bāp thā,⁴⁵ Sammī Maūn kā aur Maūn Bait-sūr kā.

⁴⁶ Kālib kī dāshtā Aifā ke beṭe Hārān, Mauzā aur Jāziz paidā hue. Hārān ke beṭe kā nām Jāziz thā.⁴⁷ Yahdī ke beṭe Rajam, Yūtām, Jesān, Falat, Aifā aur Shāf the.

⁴⁸ Kālib kī dūsrī dāshtā Mākā ke beṭe Shibar, Tirhanā,⁴⁹ Shāf (Madmannā kā bāp) aur Siwā (Makbenā aur Jibiyā kā bāp) paidā hue. Kālib kī ek betī bhī thī jis kā nām Aksā thā.⁵⁰ Sab Kālib kī aulād the.

Ifrātā ke pahlauṭhe Hūr ke beṭe Qiriyat-yārīm kā bāp Sobal,⁵¹ Bait-laham kā bāp Salmā aur Bait-jādir kā bāp Khārif the.⁵² Qiriyat-yārīm ke bāp Sobal se yih gharāne nikle: Harāī, Mānahat kā ādhā hissā⁵³ aur Qiriyat-yārīm ke khāndān Uttarī, Fūtī, Sumātī aur Misrāī. In se Sur'ātī aur Istālī nikle hain.

⁵⁴ Salmā se zail ke gharāne nikle: Bait-laham ke bāshinde, Natūfātī, Atarāt-bait-yoāb, Mānahat kā ādhā hissā, Sur'ī ⁵⁵ aur Yābīz meñ ābād munshiyon ke ķhāndān Tir'atī, Sim'atī aur Sūkātī. Yih sab Qīnī the jo Raikābiyon ke bāp Hammat se nikle the.

3

Dāūd Bādshāh kī Aulād

¹ Habrūn meñ Dāūd Bādshāh ke darj-e-zail betē paidā hue:

Pahlauṭhā Amnon thā jis kī mān Akhīnūsam Yazraelī thī. Dūsrā Dānyāl thā jis kī mān Abījel Karmilī thī. ² Tīsrā Abīsalūm thā. Us kī mān Mākā thī jo Jasūr ke bādshāh Talmī kī betī thī. Chauthā Adūniyāh thā jis kī mān Hajjīt thī. ³ Pāñchwān Safatiyāh thā jis kī mān Abītāl thī. Chhaṭā Itriyām thā jis kī mān Ijlā thī. ⁴ Dāūd ke yih chhih betē un sārhe sāt sāloñ ke daurān paidā hue jab Habrūn us kā dārul-hukūmat thā.

Is ke bād wuh Yarūshalam meñ muntaqil huā aur wahān mazid 33 sāl hukūmat kartā rahā. ⁵ Us daurān us kī bīwī Bat-sabā bint Ammiyel ke chār betē Simā, Sobāb, Nātan aur Sulemān paidā hue. ⁶ Mazid betē bhī paidā hue, Ibhār, Ilīsua, Ilīfalat, ⁷ Naujā, Nafaj, Yafīa, ⁸ Ilīsamā, Ilyadā aur Ilīfalat. Kul nau betē the. ⁹ Tamr un kī bahan thī. In ke alāwā Dāūd kī dāshtāoñ ke betē bhī the.

¹⁰ Sulemān ke hān Rahubiyām paidā huā, Rahubiyām ke Abiyāh, Abiyāh ke Āsā, Āsā ke Yahūsafat, ¹¹ Yahūsafat ke Yahūrām, Yahūrām ke Akhaziyāh, Akhaziyāh ke Yuās, ¹² Yuās ke

Amasiyāh, Amasiyāh ke Azariyāh yānī Uzziyāh, Uzziyāh ke Yūtām, ¹³ Yūtām ke Ākhaż, Ākhaż ke Hizqiyāh, Hizqiyāh ke Manassī, ¹⁴ Manassī ke Amūn aur Amūn ke Yūsiyāh.

¹⁵ Yūsiyāh ke chār bete baṛे se le kar chhoṭe tak Yūhanān, Yahūyaqīm, Sidqiyāh aur Sallūm the.

¹⁶ Yahūyaqīm Yahūyākīn * kā aur Yahūyākīn Sidqiyāh kā bāp thā. ¹⁷ Yahūyākīn † ko Bābal meñ jilāwatan kar diyā gayā. Us ke sāt bete Siyāltiyel, ¹⁸ Malkirām, Fidāyāh, Shenāzzar, Yaqamiyāh, Hūsamā aur Nadabiyāh the. ¹⁹ Fidāyāh ke do bete Zarubbābal aur Simāi the.

Zarubbābal ke do bete Masullām aur Hananiyāh the. Ek betī banām Salūmīt bhī paidā huī. ²⁰ Bāqī pāñch betoñ ke nām Hasūbā, Ohal, Barakiyāh, Hasdiyāh aur Yūsab-hasad the.

²¹ Hananiyāh ke do bete Falatiyāh aur Yasāyāh the. Yasāyāh Rifāyāh kā bāp thā, Rifāyāh Arnān kā, Arnān Abadiyāh kā aur Abadiyāh Sakaniyāh kā.

²² Sakaniyāh ke bete kā nām Samāyāh thā. Samāyāh ke chhīh bete Hattūsh, Ijāl, Barīh, Na'ariyāh aur Sāfat the. ²³ Na'ariyāh ke tīn bete Iliyuainī, Hizqiyāh aur Azrīqām paidā hue.

²⁴ Iliyuainī ke sāt bete Hūdāwiyāh, Iliyāsib, Filāyāh, Aqqūb, Yūhanān, Dilāyāh aur Anānī the.

* ^{3:16} Ibrānī meñ Yahūyākīn kā mutarādif Yakūniyāh mustāmal hai. † ^{3:17} Ibrānī meñ Yahūyākīn kā mutarādif Yakūniyāh mustāmal hai.

4

Yahūdāh kī Aulād

¹ Fāras, Hasron, Karmī, Hūr aur Sobal Yahūdāh kī aulād the.

² Riyāyāh bin Sobal ke hānī Yahat, Yahat ke Akhūmī aur Akhūmī ke Lāhad paidā huā. Yih Sur'ātī khāndānoṇ ke bāpdādā the.

³ Aitām ke tīn bete Yazrael, Ismā aur Idbās the. Un kī bahan kā nām Hazlilfonī thā.

⁴ Ifrātā kā pahlauṭhā Hūr Bait-laham kā bāp thā. Us ke do bete Jadūr kā bāp Fanuel aur Hūsā kā bāp Azar the.

⁵ Taqua ke bāp Ashhūr kī do bīwiyān Hīlāh aur Nārā thīn.

⁶ Nārā ke bete Akhūzzām, Hifar, Temnī aur Haκhastarī the.

⁷ Hīlāh ke bete Zarat, Suhar aur Itnān the.

⁸ Kūz ke bete Anūb aur Hazzobibā the. Us se Akharkhail bin Harūm ke khāndān bhī nikle.

⁹ Yābīz kī apne bhāiyoṇ kī nisbat zyādā izzat thī. Us kī mān ne us kā nām Yābīz yānī ‘Wuh Taklīf Detā Hai’ rakhā, kyoṇki us ne kahā, “Paidā hote waqt mujhe barī taklīf huī.” ¹⁰ Yābīz ne buland āwāz se Isrāīl ke Khudā se iltamās kī, “Kāsh tū mujhe barkat de kar merā ilāqā wasī kar de. Terā hāth mere sāth ho, aur mujhe nuqsān se bachā tāki mujhe taklīf na pahuñche.” Aur Allāh ne us kī sunī.

¹¹ Sūkhā ke bhāī Kalūb Mahīr kā aur Mahīr Istūn kā bāp thā.

¹² Istūn ke bete Bait-rafā, Fāsah aur Taκhinnā the.

Taκhinnā Nāhas Shahr kā bāp thā jis kī aulād Raikā men̄ ābād hai. ¹³ Qanaz ke bete Ĝhutniyel

aur Sirāyāh the. Ḍhutniyel ke beṭoṇ ke nām Hatat aur Maūnātī the.

¹⁴ Maūnātī Ufrā kā bāp thā.

Sirāyāh Yoāb kā bāp thā jo ‘Wādī-e-Kārīgar’ kā bānī thā. Ābādī kā yih nām is lie paṛ gayā ki us ke bāshinde kārīgar the.

¹⁵ Kālib bin Yafunnā ke beṭe Īrū, Ailā aur Nām the. Ailā kā beṭā Qanaz thā.

¹⁶ Yahallalel ke chār beṭe Zīf, Zīfā, Tīriyāh aur Asarel the.

¹⁷⁻¹⁸ Azrā ke chār beṭe Yatar, Marad, Ifar aur Yalūn the. Marad kī shādī Misrī bādshāh Firaun kī beṭī Bitiyāh se huī. Us ke tīn bachche Mariyam, Sammī aur Isbāh paidā hue. Isbāh Istimua kā bāp thā. Mard kī dūsrī bīwī Yahūdāh kī thī, aur us ke tīn beṭe Jadūr kā bāp Yarad, Sokā kā bāp Hibar aur Zanūh kā bāp Yaqūtiyel the.

¹⁹ Hūdiyāh kī bīwī Naham kī bahan thī. Us kā ek beṭā Qailā Jarmī kā bāp aur dūsrā Istimua Mākātī thā.

²⁰ Sīmūn ke beṭe Amnon, Rinnā, Bin-hanān aur Tīlon the. Yisaī ke beṭe Zohit aur Bin-zohit the.

²¹ Selā bin Yahūdāh kī darj-e-zail aulād thī: Lekā kā bāp Er, Maresā kā bāp Lādā, Bait-ashbīa meñ ābād bārīk katān kā kām karne wāloṇ ke khāndān, ²² Yoqīm, Kozībā ke bāshinde, aur Yuās aur Sārāf jo qadīm riwāyat ke mutābiq Moāb par hukmrānī karte the lekin bād meñ Bait-laham wāpas āe. ²³ Wuh Natāīm aur Jadīrā meñ rah kar kumhār aur bādshāh ke mulāzim the.

Shamāūn kī Aulād

²⁴ Shamāūn ke beṭe Yamuel, Yamīn, Yarīb, Zārah aur Sāūl the. ²⁵ Sāūl ke hān Sallūm paidā

huā, Sallūm ke Mibsām, Mibsām ke Mishmā,
²⁶ Mishmā ke Hammuel, Hammuel ke Zakkūr
 aur Zakkūr ke Simāī. ²⁷ Simāī ke 16 beṭe aur
 chhih beṭiyān thiñ, lekin us ke bhāiyon ke kam
 bachche paidā hue. Natīje meñ Shamāūn kā
 qabīlā Yahūdāh ke qabīle kī nisbat chhoṭā rahā.

²⁸ Zail ke shahr un ke gird-o-nawāh kī
 ābādiyon samet Shamāūn kā qabāylī ilāqā thā:
 Bair-sabā, Molādā, Hasār-suāl, ²⁹ Bilhāh, Azam,
 Tolad, ³⁰ Batuel, Hurmā, Siqlāj, ³¹ Bait-markabot,
 Hasār-sūsīm, Bait-birī aur Shāraim. Dāūd kī
 hukūmat tak yih qabīlā in jaghoñ meñ ābād thā,
³² nīz Aitām, Ain, Rimmon, Tokan aur Asan meñ
 bhī. ³³ In pāñch ābādiyon ke gird-o-nawāh ke
 dehāt bhī Bāl tak shāmil the. Har maqām ke
 apne apne tahrīrī nasabnāme the.

³⁴ Shamāūn ke khāndānoñ ke darj-e-zail
 sarparast the: Misobāb, Yamlīk, Yūshā bin
 Amasiyāh, ³⁵ Yoel, Yāhū bin Yūsibiyāh bin
 Sirāyāh bin Asiyel, ³⁶ Iliyuainī, Yāqūbā,
 Yashūkhyā, Asāyāh, Adiyel, Yasīmiyel,
 Bināyāh, ³⁷ Zizā bin Shifaī bin Allon bin Yadāyāh
 bin Simrī bin Samāyāh.

³⁸ Darj-e-bālā ādmī apne khāndānoñ ke
 sarparast the. Un ke khāndān bahut barh
 gae. ³⁹ Is lie wuh apne rewaṛoñ ko charāne
 kī jagheñ ḫhūndte ḫhūndte wādī ke mashriq
 meñ Jadūr tak phail gae. ⁴⁰ Wahān unheñ
 achchhī aur shādāb charāgāheñ mil gaīn. Ilāqā
 khulā, pursukūn aur ārāmdeh bhī thā. Pahle
 Hām kī kuchh aulād wahān ābād thī, ⁴¹ lekin
 Hizqiyāh Bādshāh ke aiyām meñ Shamāūn ke
 mazkūrā sarparastoñ ne wahān ke rahne wāle

Hāmiyon aur Maūniyoṇ par hamlā kiyā aur un ke tambuoṇ ko tabāh karke sab ko mār diyā. Ek bhī na bachā. Phir wuh ƙhud wahān ābād hue. Ab un ke rewaṛoṇ ke lie kāfī charāgāheṇ thīn. Āj tak wuh isī ilāqe men̄ rahte haiṇ.

⁴² Ek din Shamāūn ke 500 ādmī Yisaī ke chār betoṇ Falatiyāh, Na'ariyāh, Rifāyāh aur Uzziyel kī rāhnumāī meñ Saīr ke pahārī ilāqe meñ ghus gae. ⁴³ Wahān unhoṇ ne un Amālīqiyōṇ ko halāk kar diyā jinhoṇ ne bach kar wahān panāh lī thī. Phir wuh ƙhud wahān rahne lage. Āj tak wuh wahān ābād haiṇ.

5

Rūbin kī Aulād

¹ Isrāīl kā pahlauṭhā Rūbin thā. Lekin chūnki us ne apne bāp kī dāshtā se hambistar hone se bāp kī behurmatī kī thī is lie pahlauṭhe kā maurūsī haq us ke bhāī Yūsuf ke betoṇ ko diyā gayā. Isī wajah se nasabnāme meñ Rūbin ko pahlauṭhe kī haisiyat se bayān nahīn kiyā gayā. ² Yahūdāh dīgar bhāiyoṇ kī nisbat zyādā tāqatwar thā, aur us se qaum kā bādshāh niklā. To bhī Yūsuf ko pahlauṭhe kā maurūsī haq hāsil thā.

³ Isrāīl ke pahlauṭhe Rūbin ke chār bete Hanūk, Fallū, Hasron aur Karmī the.

⁴ Yoel ke hān Samāyāh paidā huā, Samāyāh ke Jūj, Jūj ke Simaī, ⁵ Simaī ke Mīkāh, Mīkāh ke Riyāyāh, Riyāyāh ke Bāl aur ⁶ Bāl ke Bairā. Bairā ko Asūr ke bādshāh Tiglat-pilesar ne jilāwatan kar diyā. Bairā Rūbin ke qabile kā sarparast thā. ⁷ Un ke nasabnāme meñ us ke bhāī un ke

khāndānoṇ ke mutābiq darj kie gae haiṇ, sar-e-fahrist Ya'iyel, phir Zakariyāh ⁸ aur Bālā bin Azaz bin Samā bin Yoel.

Rūbin kā qabilā Aroīr se le kar Nabū aur Bālmaūn tak ke ilāqe meṇ ābād huā. ⁹ Mashriq kī taraf wuh us registān ke kināre tak phail gae jo Dariyā-e-Furāt se shurū hotā hai. Kyonki Jiliyād meṇ un ke rewaṛoṇ kī tādād bahut barh gaī thī.

¹⁰ Sāūl ke aiyām meṇ unhoṇ ne Hājiriyoṇ se laṛ kar unheṇ halāk kar diyā aur khud un kī ābādiyoṇ meṇ rahne lage. Yoṇ Jiliyād ke mashriq kā pūrā ilāqā Rūbin ke qabīle kī milkiyat meṇ ā gayā.

Jad kī Aulād

¹¹ Jad kā qabilā Rūbin ke qabīle ke parosī mulk Basan meṇ Salkā tak ābād thā. ¹² Us kā sarbarāh Yoel thā, phir Sāfam, Yānī aur Sāfat. Wuh sab Basan meṇ ābād the. ¹³ Un ke bhāī un ke khāndānoṇ samet Mīkāel, Masullām, Sabā, Yūrī, Yākān, Zīa aur Ibar the. ¹⁴ Yih sāt ādmī Abīkhail bin Hūrī bin Yārūh bin Jiliyād bin Mīkāel bin Yasīsī bin Yahdū bin Būz ke beṭe the. ¹⁵ Akhī bin Abdiyel bin Jūnī in khāndānoṇ kā sarparast thā.

¹⁶ Jad kā qabilā Jiliyād aur Basan ke ilāqoṇ kī ābādiyoṇ meṇ ābād thā. Shārūn se le kar sarhad tak kī pūrī charāgāheṇ bhī un ke qabze meṇ thīn. ¹⁷ Yih tamām khāndān Yahūdāh ke bādshāh Yūtām aur Isrāīl ke bādshāh Yarubiyām ke zamāne meṇ nasabnāme meṇ darj kie gae.

Dariyā-e-Yardan ke Mashriq meṇ Qabīloṇ kī Jang

¹⁸ Rūbin, Jad aur Manassī ke ādhe qabile ke 44,760 faujī the. Sab laṛne ke qābil aur tajrabākār ādmī the, aise log jo tūr chalā sakte aur dhāl aur talwār se lais the. ¹⁹ Unhoṇ ne Hājiriyoṇ, Yatūr, Nafīs aur Nodab se jang kī. ²⁰ Larṭe waqt unhoṇ ne Allāh se madad ke lie fariyād kī, to us ne un kī sun kar Hājiriyoṇ ko un ke ittahādiyoṇ samet un ke hawāle kar diyā. ²¹ Unhoṇ ne un se bahut kuchh lūṭ liyā: 50,000 ūnīt, 2,50,000 bher-bakriyān aur 2,000 gadhe. Sāth sāth unhoṇ ne 1,00,000 logon ko qaid bhī kar liyā. ²² Maidān-e-jang mein beshumār dushman māre gae. Kyonki jang Allāh kī thī. Jab tak Isrāiliyon ko Asūr mein jilāwatan na kar diyā gayā wuh is ilāqे mein ābād rahe.

Manassī kā Ādhā Qabīlā

²³ Manassī kā ādhā qabīlā bahut baṛā thā. Us ke log Basan se le kar Bāl-harmūn aur Sanīr yānī Harmūn ke pahāṛī silsile tak phail gae. ²⁴ Un ke khāndānī sarparast Ifar, Yisaī, Iliyel, Azriyel, Yarmiyāh, Hūdāwiyāh aur Yahdiyel the. Sab māhir faujī, mashhūr ādmī aur khāndānī sarbarāh the.

Mashriqī Qabilōn kī Jilāwatanī

²⁵ Lekin yih mashriqi qabile apne bāpdādā ke Khudā se bewafā ho gae. Wuh zinā karke mulk ke un aqwām ke dewatāoṇ ke pīchhe lag gae jin ko Allāh ne un ke āge se miṭā diyā thā. ²⁶ Yih dekh kar Isrāīl ke Khudā ne Asūr ke bādshāh Tiglat-pilesar ko un ke khilāf barpā kiyā jis ne Rūbin, Jad aur Manassī ke ādhe qabile ko

jilāwatan kar diyā. Wuh unheñ Ḳhalah, Dariyā-e-Ḳhābūr, Hārā aur Dariyā-e-Jauzān ko le gayā jahān wuh āj tak ābād haiñ.

6

Imām-e-Āzam kī Nasl (Lāwī kā Qabīlā)

¹ Lāwī ke beṭe Jairson, Qihāt aur Mirārī the.

² Qihāt ke beṭe Amrām, Izhār, Habrūn aur Uzziyel the.

³ Amrām ke beṭe Hārūn aur Mūsā the. Betī kā nām Mariyam thā. Hārūn ke beṭe Nadab, Abīhū, Iliyazar aur Itamar the.

⁴ Iliyazar ke hān Fīnhās paidā huā, Fīnhās ke Abīsua, ⁵ Abīsua ke Buqqī, Buqqī ke Uzzī, ⁶ Uzzī ke Zarākhiyāh, Zarākhiyāh ke Mirāyat, ⁷ Mirāyat ke Amariyāh, Amariyāh ke Akhītūb, ⁸ Akhītūb ke Sadoq, Sadoq ke Akhīmāz, ⁹ Akhīmāz ke Azariyāh, Azariyāh ke Yūhanān ¹⁰ aur Yūhanān ke Azariyāh. Yihī Azariyāh Rab ke us ghar kā pahlā imām-e-āzam thā jo Sulemān ne Yarūshalam meñ banwāyā thā. ¹¹ Us ke hān Amariyāh paidā huā, Amariyāh ke Akhītūb, ¹² Akhītūb ke Sadoq, Sadoq ke Sallūm, ¹³ Sallūm ke Ḳhilqiyāh, Ḳhilqiyāh ke Azariyāh, ¹⁴ Azariyāh ke Sirāyāh aur Sirāyāh ke Yahūsadaq. ¹⁵ Jab Rab ne Nabūkadnazzar ke hāth se Yarūshalam aur pūre Yahūdāh ke bāshindoñ ko jilāwatan kar diyā to Yahūsadaq bhī un meñ shāmil thā.

Lāwī kī Aulād

¹⁶ Lāwī ke tīn beṭe Jairsom, Qihāt aur Mirārī the. ¹⁷ Jairsom ke do beṭe Libnī aur Simāī the.

¹⁸ Qihāt ke chār beṭe Amrām, Izhār, Habrūn aur

Uzziyel the. ¹⁹ Mirārī ke do beṭe Mahlī aur Mūshī the.

Zail meñ Lāwī ke ḥāndānoñ kī fahrist un ke bāniyoñ ke mutābiq darj hai.

²⁰ Jairsom ke hān Libnī paidā huā, Libnī ke Yahat, Yahat ke Zimmā, ²¹ Zimmā ke Yuāk̄h, Yuāk̄h ke Iddū, Iddū ke Zārah aur Zārah ke Yatrī.

²² Qihāt ke hān Ammīnadāb paidā huā, Ammīnadāb ke Qorah, Qorah ke Assīr, ²³ Assīr ke Ilqānā, Ilqānā ke Abiyāsaf, Abiyāsaf ke Assīr, ²⁴ Assīr ke Tahat, Tahat ke Ūriyel, Ūriyel ke Uzziyāh aur Uzziyāh ke Sāūl. ²⁵ Ilqānā ke beṭe Amāsī, Akhīmot ²⁶ aur Ilqānā the. Ilqānā ke hān Zūfī paidā huā, Zūfī ke Nahat, ²⁷ Nahat ke Iliyāb, Iliyāb ke Yarohām, Yarohām ke Ilqānā aur Ilqānā ke Samuel. ²⁸ Samuel kā pahlā beṭā Yoel aur dūsrā Abiyāh thā.

²⁹ Mirārī ke hān Mahlī paidā huā, Mahlī ke Libnī, Libnī ke Simāī, Simāī ke Uzzā, ³⁰ Uzzā ke Simā, Simā ke Hajjiyāh aur Hajjiyāh ke Asāyāh.

Lāwī kī Zimmedāriyān

³¹ Jab ahd kā sandūq Yarūshalam meñ lāyā gayā tāki āindā wahān rahe to Dāūd Bādshāh ne kuchh Lāwiyoñ ko Rab ke ghar meñ git gāne kī zimmedārī dī. ³² Is se pahle ki Sulemān ne Rab kā ghar banwāyā yih log apnī khidmat mulāqāt ke khaime ke sāmne saranjām dete the. Wuh sab kuchh muqarrarā hidāyat ke mutābiq adā karte the. ³³ Zail meñ un ke nām un ke beṭoñ ke nāmoñ samet darj haiñ.

Qihāt ke ḥāndān kā Haimān pahlā gulūkār thā. Us kā pūrā nām yih thā: Haimān bin Yoel

bin Samuel ³⁴ bin Ilqānā bin Yarohām bin Iliyel bin Tūkh ³⁵ bin Sūf bin Ilqānā bin Mahat bin Amāsī ³⁶ bin Ilqānā bin Yoel bin Azariyāh bin Safaniyāh ³⁷ bin Tahat bin Assīr bin Abiyāsaf bin Qorah ³⁸ bin Izhār bin Qihāt bin Lāwī bin Isrāīl.

³⁹ Haimān ke dahne hāth Āsaf khaṛā hotā thā. Us kā pūrā nām yih thā: Āsaf bin Barakiyāh bin Simā ⁴⁰ bin Mīkāel bin Bāsiyāh bin Malkiyāh ⁴¹ bin Atnī bin Zārah bin Adāyāh ⁴² bin Aitān bin Zimmā bin Simāi ⁴³ bin Yahat bin Jairsom bin Lāwī.

⁴⁴ Haimān ke bāeñ hāth Aitān khaṛā hotā thā. Wuh Mirārī ke қhāndān kā fard thā. Us kā pūrā nām yih thā: Aitān bin Qīsī bin Abdī bin Mallük ⁴⁵ bin Hasbiyāh bin Amasiyāh bin Khilqiyāh ⁴⁶ bin Amsī bin Bānī bin Samar ⁴⁷ bin Mahlī bin Mūshī bin Mirārī bin Lāwī.

⁴⁸ Dūsre Lāwiyoṇ ko Allāh kī sukūnatgāh meñ bāqīmāndā zimmedāriyān dī gaī thiñ.

⁴⁹ Lekin sirf Hārūn aur us kī aulād bhasm hone wālī qurbāniyān pesh karte aur bakhūr kī qurbāngāh par baikhūr jalāte the. Wuhī Muqaddastarīn Kamre meñ har қhidmat saranjām dete the. Isrāīl kā kaffārā denā unhiñ kī zimmedārī thi. Wuh sab kuchh ain un hidāyāt ke mutābiq adā karte the jo Allāh ke қhādim Mūsā ne unheñ dī thiñ.

⁵⁰ Hārūn ke hāñ Iliyazar paidā huā, Iliyazar ke Fīnhās, Fīnhās ke Abīsua, ⁵¹ Abīsua ke Buqqī, Buqqī ke Uzzī, Uzzī ke Zarakhiyāh, ⁵² Zarakhiyāh ke Mirāyat, Mirāyat ke Amariyāh, Amariyāh ke Akhītūb, ⁵³ Akhītūb ke Sadoq, Sadoq ke Akhīmāz.

Lāwiyon kī Ābādiyān

⁵⁴ Zail meñ wuh ābādiyān aur charāgāheñ darj hain jo Lāwiyon ko qurā ḥāl kar dī gaīn.

Qurā ḥālte waqt pahle Hārūn ke bete Qihāt kī aulād ko jagheñ mil gaīn. ⁵⁵ Use Yahūdāh ke qabile se Habrūn Shahr us kī charāgāhoñ samet mil gayā. ⁵⁶ Lekin gird-o-nawāh ke khet aur dehāt Kālib bin Yafunnā ko die gae. ⁵⁷ Habrūn un shahron meñ shāmil thā jin meñ har wuh panāh le saktā thā jis ke hāthoñ ġhairirādī taur par koī halāk huā ho. Habrūn ke alāwā Hārūn kī aulād ko zail ke maqām un kī charāgāhoñ samet die gae: Libnā, Yattīr, Istimua, ⁵⁸ Haulūn, Dabīr, ⁵⁹ Asan, aur Bait-shams. ⁶⁰ Binyamīn ke qabile se unheñ Jibaūn, Jibā, Alamat aur Anatot un kī charāgāhoñ samet die gae. Is tarah Hārūn ke khāndān ko 13 shahr mil gae.

⁶¹ Qihāt ke bāqī khāndānoñ ko Manassī ke mağhrībī hisse ke das shahr mil gae.

⁶² Jairsom kī aulād ko Ishkār, Āshar, Naftālī aur Manassī ke qabiloñ ke 13 shahr die gae. Yih Manassī kā wuh ilāqā thā jo Dariyā-e-Yardan ke mashriq meñ Mulk-e-Basan meñ thā.

⁶³ Mirārī kī aulād ko Rūbin, Jad aur Zabūlūn ke qabiloñ ke 12 shahr mil gae.

⁶⁴⁻⁶⁵ Yoñ Isrāīliyoñ ne qurā ḥāl kar Lāwiyon ko mazkūrā shahr de die. Sab Yahūdāh, Shamāūn aur Binyamīn ke qabāylī ilāqoñ meñ the.

⁶⁶ Qihāt ke chand ek khāndānoñ ko Ifrāīm ke qabile se shahr un kī charāgāhoñ samet mil gae.

⁶⁷ In meñ Ifrāīm ke pahārī ilāqe kā shahr Sikam shāmil thā jis meñ har wuh panāh le saktā thā jis se koī ġhairirādī taur par halāk huā hotā thā,

phir Jazar, ⁶⁸ Yuqmiyām, Bait-haurūn, ⁶⁹ Aiyālon aur Jāt-rimmon. ⁷⁰ Qihāt ke bāqī kunboñ ko Manassī ke mağħribī hisse ke do shahr Āner aur Bilām un kī charāgāhoñ samet mil gae.

⁷¹ Jairsom kī aulād ko zail ke shahr bhī un kī charāgāhoñ samet mil gae: Manassī ke mashriqī hisse se Jaulān jo Basan meñ hai aur Astārāt. ⁷² Ishkār ke qabīle se Qādis, Dābarat, ⁷³ Rāmāt aur Ānim. ⁷⁴ Āshar ke qabīle se Misāl, Abdon, ⁷⁵ Huqūq aur Rahob. ⁷⁶ Aur Naftālī ke qabīle se Galīl kā Qādis, Hammūn aur Qiriyatāym.

⁷⁷ Mirārī ke bāqī khāndānoñ ko zail ke shahr un kī charāgāhoñ samet mil gae: Zabūlūn ke qabīle se Rimmon aur Tabūr. ⁷⁸⁻⁷⁹ Rūbin ke qabile se registān kā Basar, Yahaz, Qadīmāt aur Mifāt. (Yih shahr Dariyā-e-Yardan ke mashriq meñ Yarīhū ke muqābil wāqe hain.) ⁸⁰ Jad ke qabīle se Jiliyād kā Rāmāt, Mahanāym, ⁸¹ Hasbon aur Yāzer.

7

Ishkār kī Aulād

¹ Ishkār ke chār bete Tolā, Fuwwā, Yasūb aur Simron the.

² Tolā ke pāñch bete Uzzī, Rifāyāh, Yariyel, Yahmī, Ibsām aur Samuel the. Sab apne khāndānoñ ke sarparast the. Nasabnāme ke mutābiq Dāūd ke zamāne meñ Tolā ke khāndān ke 22,600 afrād jang karne ke qābil the.

³ Uzzī kā betā Izraķhiyāh thā jo apne chār bhāiyon Mīkāel, Abadiyāh, Yoel aur Yissiyāh ke sāth khāndānī sarparast thā. ⁴ Nasabnāme ke mutābiq un ke 36,000 afrād jang karne ke qābil

the. In kī tādād is lie zyādā thī ki Uzzī kī aulād ke bahut bāl-bachche the. ⁵ Ishkār ke qabile ke khāndānoṇ ke kul 87,000 ādmī jang karne ke qābil the. Sab nasabnāme meñ darj the.

Binyamīn aur Naftālī kī Aulād

⁶ Binyamīn ke tūn beṭe Bālā, Bakar aur Yadiyael the. ⁷ Bālā ke pāñch beṭe Isbūn, Uzzī, Uzziyel, Yarīmot aur Īrī the. Sab apne khāndānoṇ ke sarparast the. Un ke nasabnāme ke mutābiq un ke 22,034 mard jang karne ke qābil the.

⁸ Bakar ke 9 beṭe Zamīrā, Yuās, Iliyazar, Iliyuainī, Umrī, Yarīmot, Abiyāh, Anatot aur Alamat the. ⁹ Un ke nasabnāme meñ un ke sarparast aur 20,200 jang karne ke qābil mard bayān kie gae haiṇ.

¹⁰ Bilhān bin Yadiyael ke sāt beṭe Yaūs, Binyamīn, Ahūd, Kanānā, Zaitān, Tarsīs aur Akhīsahar the. ¹¹ Sab apne khāndānoṇ ke sarparast the. Un ke 17,200 jang karne ke qābil mard the.

¹² Suffī aur Huffī Īr kī aur Hushī Akhīr kī aulād the.

¹³ Naftālī ke chār beṭe Yahsiyel, Jūnī, Yisar aur Sallūm the. Sab Bilhāh kī aulād the.

Manassī kī Aulād

¹⁴ Manassī kī Arāmī dāshtā ke do beṭe Asriyel aur Jiliyād kā bāp Makīr paidā hue. ¹⁵ Makīr ne Huffiyoṇ aur Suffiyoṇ kī ek aurat se shādī kī. Bahan kā nām Mākā thā. Makīr ke dūsre beṭe kā nām Silāfihād thā jis ke hān sirf beṭiyān paidā huīn.

¹⁶ Makīr kī bīwī Mākā ke mazīd do beṭe Faras aur Sharas paidā hue. Sharas ke do beṭe Aulām

aur Raqam the. ¹⁷ Aulām ke bete kā nām Bidān thā. Yihī Jiliyād bin Makīr bin Manassī kī aulād the.

¹⁸ Jiliyād kī bahan mūlikat ke tīn bete Ishhūd, Abiyazar aur Mahlāh the. ¹⁹ Samīdā ke chār bete Akhiyān, Sikam, Līghī aur Aniyām the.

Ifrāīm kī Aulād

²⁰ Ifrāīm ke hānī Sūtalah paidā huā, Sūtalah ke Barad, Barad ke Tahat Tahat ke Iliadā, Iliadā ke Tahat ²¹ Tahat ke Zabad aur Zabad ke Sūtalah.

Ifrāīm ke mazīd do bete Azar aur Iliad the. Yih do mard ek din Jāt gae tāki wahān ke rewaṛ lūṭ len̄. Lekin maqāmī logoṇ ne unheṇ pakar kar mār dālā. ²² Un kā bāp Ifrāīm kāfī arse tak un kā mātam kartā rahā, aur us ke rishtedār us se milne āe tāki use tasallī deñ. ²³ Jab is ke bād us kī bīwī ke betā paidā huā to us ne us kā nām Bariyā yānī Musībat rakhā, kyoñki us waqt khāndān musībat meñ ā gayā thā. ²⁴ Ifrāīm kī betī sairā ne Bālāī aur Nashebī Bait-haurūn aur Uzzan-sairā ko banwāyā.

²⁵ Ifrāīm ke mazīd do bete Rafah aur Rasaf the. Rasaf ke hānī Tilah paidā huā, Tilah ke Tahan, ²⁶ Tahan ke Lādān, Lādān ke Ammīhūd, Ammīhūd ke Ilīsamā, ²⁷ Ilīsamā ke Nūn, Nūn ke Yashua.

²⁸ Ifrāīm kī aulād ke ilāqe meñ zail ke maqām shāmil the: Baitel gird-o-nawāh kī ābādiyon samet, mashriq meñ Nārān tak, mağhrib meñ Jazar tak gird-o-nawāh kī ābādiyon samet, shimāl meñ Sikam aur Aiyāh tak gird-o-nawāh kī ābādiyon samet. ²⁹ Bait-shān, Tānak, Majiddo

aur Dor gird-o-nawāh kī ābādiyon samet Manassī kī aulād kī milkiyat ban gae. In tamām maqāmoṇ meṇ Yūsuf bin Isrāil kī aulād rahtī thī.

Āshar kī Aulād

³⁰ Āshar ke chār bete Yimnā, Iswāh, Iswī aur Bariyā the. Un kī bahan Sirah thī.

³¹ Bariyā ke bete Hibar aur Birzāyt kā bāp Malkiyel the.

³² Hibar ke tīn bete Yaflīt, Shūmīr aur Khūtām the. Un kī bahan Sua thī.

³³ Yaflīt ke tīn bete Fāsak, Bimhāl aur Aswāt the. ³⁴ Shūmīr ke chār bete Akhī, Rūhjā, Hubbā aur Arām the. ³⁵ Us ke bhāī Hīlam ke chār bete Sūfah, Imnā, Salas aur Amal the.

³⁶ Sūfah ke 11 bete Sūh, Harnafar, Suāl, Bairī, Imrāh,

³⁷ Basar, Hūd, Sammā, Silsā, Yitrān aur Baīrā the.

³⁸ Yatar ke tīn bete Yafunnā, Fisfāh aur Arā the.

³⁹ Ullā ke tīn bete Araķh, Hanniyel aur Riziyāh the.

⁴⁰ Āshar ke darj-e-bālā tamām afrād apne apne khāndānoṇ ke sarparast the. Sab chīdā mard, māhir faujī aur sardāroṇ ke sarbarāh the. Nasabnāme meṇ 26,000 jang karne ke qābil mard darj haiṇ.

8

Binyamīn kī Aulād

¹ Binyamīn ke pāñch bete bare se le kar chhoṭe tak Bālā, Ashbel, Akhrakh, ² Nūhā aur Rafā the.

³ Bālā ke bete Addār, Jīrā, Abīhūd, ⁴ Abīsua, Nāmān, Akhūh, ⁵ Jīrā, Safūfān aur Hūrām the.

6-7 Ahūd ke tīn bete Nāmān, Akhiyāh aur Jīrā the. Yih un ḥāndānoṇ ke sarparast the jo pahle Jibā meṇ rahte the lekin jinheṇ bād meṇ jilāwatan karke Mānahat meṇ basāyā gayā. Uzzā aur Akhīhūd kā bāp Jīrā unheṇ wahān le kar gayā thā.

8-9 Sahraim apnī do bīwiyoṇ Hushīm aur Bārā ko talāq de kar Moāb chalā gayā. Wahān us kī bīwī Hūdas ke sāt bete Yūbāb, Zibiyā, Mesā, Malkām, **10** Yaūz, Sakiyāh aur Mirmā paidā hue. Sab bād meṇ apne ḥāndānoṇ ke sarparast ban gae. **11** Pahlī bīwī Hushīm ke do bete Abītūb aur Ilfāl paidā hue.

12-14 Ilfāl ke āṭh bete Ibar, Mish'ām, Samad, Bariyā, Samā, Ākhiyo, Shāshaq aur Yarīmot the. Samad Onū, Lūd aur gird-o-nawāh kī ābādiyoṇ kā bānī thā. Bariyā aur Samā Aiyālon ke bāshindoṇ ke sarbarāh the. Unhīn ne Jāt ke bāshindoṇ ko nikāl diyā.

15-16 Bariyā ke bete Zabadiyāh, Arād, Idar, Mīkāel, Isfāh aur Yūkhā the.

17 Ilfāl ke mazīd bete Zabadiyāh, Masullām, hizqī, Hibar, **18** Yismarī, Yizliyāh aur Yūbāb the.

19-21 Simā ke bete Yaqīm, Zikrī, Zabdī, Iliyainī, Zillatī, Iliyel, Adāyāh, Birāyāh aur Simrāt the.

22-25 Shāshaq ke bete Isfān, Ibar, Iliyel, Abdon, Zikrī, Hanān, Hananiyāh, Ailām, Anatotiyāh, Yafdiyāh aur Fanuel the.

26-27 Yarohām ke bete Samsarī, Shahāriyāh, Ataliyāh, Yārasiyāh, Iliyās aur Zikrī the. **28** Yih tamām ḥāndānī sarparast nasabnāme meṇ darj the aur Yarūshalam meṇ rahte the.

Jibaūn meñ Sāūl kā Khāndān

²⁹ Jibaūn kā bāp Ya'iyel Jibaūn meñ rahtā thā. Us kī bīwī kā nām Mākā thā. ³⁰ Baṛe se le kar chhoṭe tak un ke betē Abdon, Sūr, Qīs, Bāl, Nadab, ³¹ Jadūr, Akhiyo, Zakar ³² aur Miqlot the. Miqlot kā betā Simāh thā. Wuh bhī apne rishtedāron ke sāth Yarūshalam meñ rahte the.

³³ Nair Qīs kā bāp thā aur Qīs Sāūl kā. Sāūl ke chār betē Yūnatan, Malkīshua, Abīnadāb aur Ishbāl the.

³⁴ Yūnatan Marībbāl kā bāp thā aur Marībbāl Mīkāh kā.

³⁵ Mīkāh ke chār betē Fītūn, Malik, Tārīa aur Ākhaz the.

³⁶ Ākhaz kā betā Yahuaddā thā jis ke tīn betē Alamat, Azmāwat aur Zimrī the. Zimrī ke hān Mauzā paidā huā, ³⁷ Mauzā ke Bin'ā, Bin'ā ke Rāfā, Rāfā ke Iliyāsā aur Iliyāsā ke Asīl.

³⁸ Asīl ke chhīh betē Azrīqām, Bokirū, Ismāīl, Sa'ariyāh, Abadiyāh aur Hanān the. ³⁹ Asīl ke bhāī īshaq ke tīn betē baṛe se le kar chhoṭe tak Aulām, Yaūs aur Ilīfalat the.

⁴⁰ Aulām ke betē tajrabākār faujī the jo mahārat se tīr chalā sakte the. Un ke bahut-se betē aur pote the, kul 150 afrād. Tamām mazkūrā ādmī un ke khāndānoṇ samet Binyamīn kī aulād the.

9

Jilāwatanī ke bād Yarūshalam ke Bāshinde

¹ Tamām Isrāīl Shāhān-e-Isrāīl kī Kitāb ke nasabnāmoṇ meñ darj hai.

Phir Yahūdāh ke bāshindoṇ ko bewafāī ke bāis Bābal meñ jilāwatan kar diyā gayā. ² Jo log pahle

wāpas ā kar dubārā shahron meñ apnī maurūsī zamīn par rahne lage wuh imām, Lāwī, Rab ke ghar ke қhidmatgār aur bāqī chand ek Isrālī the. ³ Yahūdāh, Binyamīn, Ifrāīm aur Manassī ke qabiloṇ ke kuchh log Yarūshalam meñ jā base.

⁴ Yahūdāh ke qabile ke darj-e-zail қhāndānī sarparast wahān ābād hue:

Ūtī bin Ammīhūd bin Umrī bin Imrī bin Bānī. Bānī Fāras bin Yahūdāh kī aulād meñ se thā.

⁵ Sailā ke қhāndān kā pahlauṭhā Asāyāh aur us ke beṭe.

⁶ Zārah ke khāndān kā Yaūel. Yahūdāh ke in khāndānoṇ kī kul tādād 690 thī.

⁷⁻⁸ Binyamīn ke qabile ke darj-e-zail қhāndānī sarparast Yarūshalam meñ ābād hue:

Sallū bin Masullām bin Hūdāwiyyāh bin Sanūsāh.

Ibniyāh bin Yarohām.

Ailā bin Uzzī bin Miqrī.

Masullām bin Safatiyyāh bin Raūel bin Ibnīyāh.

⁹ Nasabnāme ke mutābiq Binyamīn ke in khāndānoṇ kī kul tādād 956 thī.

¹⁰ Jo imām jilāwatanī se wāpas ā kar Yarūshalam meñ ābād hue wuh zail meñ darj haiṇ:

Yadāyāh, Yahūyarīb, Yakīn, ¹¹ Allāh ke ghar kā inchārj Azariyyāh bin Khilqiyāh bin Masullām bin Sadoq bin Mirāyot bin Aķhitūb, ¹² Adāyāh bin Yarohām bin Fashhūr bin Malkiyāh aur Māsī bin Adiyel bin Yahzīrāh bin Masullām bin Masillimit bin Immer. ¹³ Imāmoṇ ke in khāndānoṇ kī kul tādād 1,760 thī. Un ke mard Rab ke ghar meñ қhidmat saranjām dene ke qābil the.

¹⁴ Jo Lāwī jilāwatanī se wāpas ā kar Yarūshalam meñ ābād hue wuh darj-e-zail hain:

Mirārī ke khāndān kā Samāyāh bin Hassūb bin Azrīqām bin Hasbiyāh, ¹⁵ Baqbaqqar, Haras, Jalāl, Mattaniyāh bin Mīkā bin Zikrī bin Āsaf, ¹⁶ Abadiyāh bin Samāyāh bin Jalāl bin Yadūtūn aur Barakiyāh bin Āsā bin Ilqānā. Barakiyāh Natūfatiyon kī abādiyon kā rahne wālā thā.

¹⁷ Zail ke darbān bhī wāpas āe: Sallūm, Aqqūb, Talmūn, Akhīmān aur un ke bhāī. Sallūm un kā inchārj thā. ¹⁸ Aj tak us kā khāndān Rab ke ghar ke mashriq meñ Shāhī Darwāze kī pahrādārī kartā hai. Yih darbān Lāwiyoṇ ke khaimoṇ ke afrād the. ¹⁹ Sallūm bin Qore bin Ābiyāsaf bin Qorah apne bhāiyoṇ ke sāth Qorah ke khāndān kā thā. Jis tarah un ke bāpdādā kī zimmedārī Rab kī khaimāgāh meñ mulāqāt ke khaime ke darwāze kī pahrādārī karnī thī usī tarah un kī zimmedārī maqdis ke darwāze kī pahrādārī karnī thī. ²⁰ Qadīm zamāne meñ Fīnhās bin Iliyazar un par muqarrar thā, aur Rab us ke sāth thā. ²¹ Bād meñ Zakariyāh bin Masalamiyāh mulāqāt ke khaime ke darwāze kā darbān thā.

²² Kul 212 mardoṇ ko darbān kī zimmedārī dī gaī thī. Un ke nām un kī maqāmī jaghoṇ ke nasabnāme meñ darj the. Dāūd aur Samuel Ğhaibbīn ne un ke bāpdādā ko yih zimmedārī dī thī. ²³ Wuh aur un kī aulād pahle Rab ke ghar yānī mulāqāt ke khaime ke darwāzon par pahrādārī karte the. ²⁴ Yih darbān Rab ke ghar

ke chāroṇ taraf ke darwāzoṇ kī pahrādārī karte the.

²⁵ Lāwī ke aksar log Yarūshalam meṇ nahīn rahte the balki bārī bārī ek hafte ke lie dehāt se Yarūshalam āte the tāki wahān apnī khidmat saranjām deṇ. ²⁶ Sirf darbānoṇ ke chār inchārj musalsal Yarūshalam meṇ rahte the. Yih chār Lāwī Allāh ke ghar ke kamroṇ aur khazānoṇ ko bhī saṁbhālte ²⁷ aur rāt ko bhī Allāh ke ghar ke irdgird guzārte the, kyoṇki unhīn ko us kī hifāzat karnā aur subah ke waqt us ke darwāzoṇ ko kholnā thā.

²⁸ Bāz darbān ibādat kā sāmān saṁbhālte the. Jab bhī use istemāl ke lie andar aur bād meṇ dubārā bāhar lāyā jātā to wuh har chīz ko gin kar chaik karte the. ²⁹ Bāz bāqī sāmān aur maqdis meṇ maujūd chīzoṇ ko saṁbhālte the. Rab ke ghar meṇ mustāmal bārīk maidā, mai, zaitūn kā tel, baķhūr aur balsān ke mukhtalif tel bhī in meṇ shāmil the. ³⁰ Lekin balsān ke teloṇ ko taiyār karnā imāmoṇ kī zimmedārī thī. ³¹ Qorah ke khāndān kā Lāwī Mattitiyāh jo Sallūm kā pahlauṭhā thā qurbānī ke lie mustāmal roṭī banāne kā intazām chalātā thā. ³² Qihāt ke khāndān ke bāz Lāwiyoṇ ke hāth meṇ wuh roṭiyān banāne kā intazām thā jo har hafte ke din ko Rab ke lie makhsūs karke Rab ke ghar ke Muqaddas Kamre kī mez par rakhī jātī thīn.

³³ Mausīqār bhī Lāwī the. Un ke sarbarāh bāqī tamām khidmat meṇ hissā nahīn lete the, kyoṇki unheṇ har waqt apnī hī khidmat saranjām dene ke lie taiyār rahnā partā thā. Is lie wuh Rab ke ghar ke kamroṇ meṇ rahte the.

³⁴ Lāwiyoṇ ke yih tamām ḥāndānī sarparast nasabnāme meṇ darj the aur Yarūshalam meṇ rahte the.

Jibaūn meṇ Sāūl ke Ḫāndān

³⁵ Jibaūn kā bāp Ya'iyel Jibaūn meṇ rahtā thā. Us kī bīwī kā nām Mākā thā. ³⁶ Baṛe se le kar chhoṭe tak un ke bete Abdon, Sūr, Qīs, Bāl, Nair, Nadab, ³⁷ Jadūr, Akhiyo, Zakariyāh aur Miqlot the. ³⁸ Miqlot kā betā Simāh thā. Wuh bhī apne bhāiyoṇ ke muqābil Yarūshalam meṇ rahte the.

³⁹ Nair Qīs kā bāp thā aur Qīs Sāūl kā. Sāūl ke chār bete Yūnatan, Malkīshua, Abīnadāb aur Ishbāl the.

⁴⁰ Yūnatan Marībbāl kā bāp thā aur Marībbāl Mīkāh kā. ⁴¹ Mīkāh ke chār bete Fītūn, Malik, Tahrea aur Ākhaz the. ⁴² Ākhaz kā betā Yārā thā. Yārā ke tīn bete Alamat, Azmāwat aur Zimrī the. Zimrī ke hān Mauzā paidā huā, ⁴³ Mauzā ke Bin'ā, banā ke Rifāyāh, Rifāyāh ke Iliyāsā aur Iliyāsā ke Asīl.

⁴⁴ Asīl ke chhih bete Azrīqām, Bokirū, Ismāīl, Sa'ariyāh, Abadiyāh aur Hanān the.

10

Sāūl aur Us ke Beṭoṇ kī Maut

¹ Jilbuā ke pahāṛī silsile par Filistiyōṇ aur Isrāīliyon ke darmiyān jang chhir gaī. Larte larte Isrāīlī farār hone lage, lekin bahut log wahīn shahīd ho gae.

² Phir Filistī Sāūl aur us ke beṭoṇ Yūnatan, Abīnadāb aur Malkīshua ke pās jā pahuñche. Tīnoṇ bete halāk ho gae, ³ jabki laṛāī Sāūl

ke irdgird urūj tak pahuñch gaī. Phir wuh tīrandāzon kā nishānā ban kar zaķhmī ho gayā. ⁴ Us ne apne silāhbardār ko hukm diyā, “Apnī talwār miyān se khīñch kar mujhe mār dāl! Warnā yih nāmakhtūn mujhe be'izzat karenge.” Lekin silāhbardār ne inkār kiyā, kyoñki wuh bahut dārā huā thā. Ākhir meñ Sāūl apnī talwār le kar ķhud us par gir gayā.

⁵ Jab silāhbardār ne dekhā ki merā mālik mar gayā hai to wuh bhī apnī talwār par gir kar mar gayā. ⁶ Yoñ us din Sāūl, us ke tīn beṭe aur us kā tamām gharānā halāk ho gae. ⁷ Jab Maidān-e-Yazrael ke Isrāiliyon ko ķhabar milī ki Isrāilī fauj bhāg gaī aur Sāūl apne beṭoñ samet mārā gayā hai to wuh apne shahroñ ko chhoṛ kar bhāg nikle, aur Filistī chhoṛे hue shahroñ par qabzā karke un meñ basne lage.

⁸ Agle din Filistī lāshoñ ko lūtne ke lie dubārā maidān-e-jang meñ ā gae. Jab unheñ Jilbua ke pahārī silsile par Sāūl aur us ke tīnoñ beṭe murdā mile ⁹ to unhoñ ne Sāūl kā sar kāt kar us kā zirābaktar utār liyā aur qāsidoñ ko apne pūre mulk meñ bhej kar apne butoñ aur apnī qaum ko fatah kī ittalā dī. ¹⁰ Sāūl kā zirābaktar unhoñ ne apne dewatāoñ ke mandir meñ mahfūz kar liyā aur us ke sar ko Dajūn Dewatā ke mandir meñ laṭkā diyā.

¹¹ Jab Yabīs-jiliyād ke bāshindoñ ko ķhabar milī ki Filistiyon ne Sāūl kī lāsh ke sāth kyā kuchh kiyā hai ¹² to shahr ke tamām laṛne ke qābil ādmī Bait-shān ke lie rawānā hue. Wahān pahuñch kar wuh Sāūl aur us ke beṭoñ kī lāshoñ ko utār kar Yabīs le gae jahān unhoñ ne un kī

hadđiyoñ ko Yabīs ke bare darakht ke sāy meñ dafnāyā. Unhoñ ne rozā rakh kar pūre hafte tak un kā mātam kiyā.

¹³ Sāūl ko is lie mārā gayā ki wuh Rab kā wafādār na rahā. Us ne us kī hidāyat par amal na kiyā, yahān tak ki us ne murdoñ kī rūh se rābitā karne wālī jādūgarnī se mashwarā kiyā, ¹⁴ hālānki use Rab se dariyāft karnā chāhie thā. Yihī wajah hai ki Rab ne use sazā-e-maut de kar saltanat ko Dāūd bin Yassī ke hawāle kar diyā.

11

Dāūd Pūre Isrāīl kā Bādshāh Ban Jātā Hai

¹ Us waqt tamām Isrāīl Habrūn meñ Dāūd ke pās āyā aur kahā, “Ham āp hī kī qaum aur āp hī ke rishtedār haiñ. ² Māzī meñ bhī jab Sāūl bādshāh thā to āp hī faujī muhimmoñ meñ Isrāīl kī qiyādat karte rahe. Aur Rab āp ke Khudā ne āp se wādā bhī kiyā hai ki tū merī qaum Isrāīl kā charwāhā ban kar us par hukūmat karegā.”

³ Jab Isrāīl ke tamām buzurg Habrūn pahuñche to Dāūd Bādshāh ne Rab ke huzūr un ke sāth ahd bāndhā, aur unhoñ ne use masah karke Isrāīl kā bādshāh banā diyā. Yoñ Rab kā Samuel kī mārifat kiyā huā wādā pūrā huā.

Dāūd Yarūshalam par Qabzā Kartā Hai

⁴ Bādshāh banane ke bād Dāūd tamām Isrāīliyoñ ke sāth Yarūshalam gayā tāki us par hamlā kare. Us zamāne meñ us kā nām Yabūs thā, aur Yabūsī us meñ baste the. ⁵ Dāūd ko dekh kar Yabūsiyoñ ne us se kahā, “Āp hamāre shahr meñ kabhī dākhil nahīn ho pāengete!”

To bhī Dāūd ne Siyyūn ke qile par qabzā kar liyā jo ājkal ‘Dāūd kā Shahr’ kahlātā hai. ⁶ Yabūs par hamlā karne se pahle Dāūd ne kahā thā, “Jo bhī Yabūsiyon par hamlā karne meñ rāhnumāī kare wuh fauj kā kamāndar banegā.” Tab Yoāb bin Zarūyāh ne pahle shahr par chārhāī kī. Chunānche use kamāndar muqarrar kiyā gayā.

⁷ Yarūshalam par fatah pāne ke bād Dāūd qile meñ rahne lagā. Us ne use ‘Dāūd kā Shahr’ qarār diyā ⁸ aur us ke irdgird shahr ko barhāne lagā. Dāūd kā yih tāmirī kām irdgird ke chabūtarōn se shurū huā aur chāron taraf phailtā gayā jabki Yoāb ne shahr kā bāqī hissā bahāl kar diyā. ⁹ Yoñ Dāūd zor pakartā gayā, kyoñki Rabbul-afwāj us ke sāth thā.

Dāūd ke Mashhūr Faujī

¹⁰ Darj-e-zail Dāūd ke sūrmāoñ kī fahrist hai. Pūre Isrāīl ke sāth unhoñ ne mazbūtī se us kī bādshāhī kī himāyat karke Dāūd ko Rab ke farmān ke mutābiq apnā bādshāh banā diyā.

¹¹ Jo tīn afsar Yoāb ke bhāī Abīshai ke ain bād āte the un meñ Yasūbiyām Hakmūnī pahle nambar par ātā thā. Ek bār us ne apne neze se 300 ādmiyoñ ko mār diyā. ¹² In tīn afsaroñ meñ se dūsrī jagah par Iliyazar bin Dodo bin Akhūhī ātā thā. ¹³ Yih Fas-dammīm meñ Dāūd ke sāth thā jab Filistī wahān laṛne ke lie jamā ho gae the. Maidān-e-jang meñ jau kā khet thā, aur laṛte laṛte Isrāīlī Filistiyoñ ke sāmne bhāgne lage. ¹⁴ Lekin Iliyazar Dāūd ke sāth khet ke bīch meñ Filistiyoñ kā muqābalā kartā rahā. Filistiyoñ ko mārte mārte unhoñ ne khet kā difā karke Rab kī madad se baṛī fatah pāī.

15-16 Ek aur jang ke daurān Dāūd Adullām ke ġhār ke pahāṛī qile meñ thā jabki Filistī fauj ne Wādī-e-Rafāīm meñ apnī lashkargāh lagāī thī. Un ke dastoñ ne Bait-laham par bhī qabzā kar liyā thā. Dāūd ke tīs ālā afsaroñ meñ se tīn us se milne āe. **17** Dāūd ko shadiñ pyās lagī, aur wuh kahne lagā, “Kaun mere lie Bait-laham ke darwāze par ke hauz se kuchh pānī lāegā?”

18 Yih sun kar tīnoñ afsar Filistiyoñ kī lashkargāh par hamlā karke us meñ ghus gae aur larte larṭe Bait-laham ke hauz tak pahuñch gae. Us se kuchh pānī bhar kar wuh use Dāūd ke pās le āe. Lekin us ne pīne se inkār kar diyā balki use qurbānī ke taur par undel kar Rab ko pesh kiyā **19** aur bolā, “Allāh na kare ki maiñ yih pānī piyūn. Agar aisā kartā to un ādmiyoñ kā khūn pītā jo apnī jān par khel kar pānī lāe haiñ.” Is lie wuh use pīnā nahīn chāhtā thā. Yih in tīn sūrmāoñ ke zabardast kāmoñ kī ek misāl hai.

20-21 Yoāb kā bhāī Abīshai mazkūrā tīn sūrmāoñ par muqarrar thā. Ek dafā us ne apne neze se 300 ādmiyoñ ko mār dālā. Tīnoñ kī nisbat us kī zyādā izzat kī jātī thī, lekin wuh khud in meñ ginā nahīn jātā thā.

22 Bināyāh bin Yahoyadā bhī zabardast faujī thā. Wuh Qabziyel kā rahne wālā thā, aur us ne bahut dafā apnī mardānagī dikhāī. Moāb ke do bare sūrmā us ke hāthoñ halāk hue. Ek bār jab bahut barf par gaī to us ne ek hauz meñ utar kar ek sherbabar ko mār dālā jo us meñ gir gayā thā. **23** Ek aur mauqe par us kā wāstā ek Misrī se parā jis kā qad sāṛhe sāt fuṭ thā. Misrī ke hāth meñ khaddī ke shahtīr jaisā baṛā nezā thā

jabki us ke apne pās sirf lāthī thī. Lekin Bināyāh ne us par hamlā karke us ke hāth se nezā chhīn liyā aur use us ke apne hathiyār se mār dālā. ²⁴ Aisī bahādurī dikhāne kī binā par Bināyāh bin Yahoyadā mazkūrā tīn ādmiyon ke barābar mashhūr huā. ²⁵ Tīs afsaroṇ ke dīgar mardoṇ kī nisbat us kī zyādā izzat kī jātī thī, lekin wuh mazkūrā tīn ādmiyon meñ ginā nahīn jātā thā. Dāūd ne use apne muhāfizoṇ par muqarrar kiyā.

²⁶ Zail ke ādmī bādshāh ke sūrmāoṇ meñ shāmil the.

Yoāb kā bhāī Asāhel, Bait-laham kā Ilhanān bin Dodo, ²⁷ Sammot Harorī, Ḳhalis Falūnī, ²⁸ Taqua kā Īrā bin Aqqīs, Anatot kā Abiyazar, ²⁹ Sibbakī Hūsātī, Īlī Akhūhī, ³⁰ Mahrī Natūfātī, Halid bin Bānā Natūfātī, ³¹ Binyamīnī shahr Jibiyā kā Ittī bin Rībī, Bināyāh Fir'ātonī ³² Nahlejās kā Hūrī, Abiyel Arbātī, ³³ Azmāwat Bahrūmī, Iliyahbā Sa'ālbūnī, ³⁴ Hashīm Jizūnī ke beṭe, Yūnatan bin Shajī Harārī, ³⁵ Akhiyām bin Sakār Harārī, Ilīfal bin Ūr, ³⁶ Hifar Makīrātī, Akhiyāh Falūnī, ³⁷ Hasro Karmilī, Nārī bin Azbī, ³⁸ Nātan kā bhāī Yoel, Mibkhār bin Hājirī, ³⁹ Silaq Ammonī, Yoāb bin Zarūyāh kā silāhbardār Nahrī Bairotī, ⁴⁰ Īrā Itrī, Jarīb Itrī, ⁴¹ Ūriyāh Hittī, Zabad bin Akhlī, ⁴² Adīnā bin Sīzā (Rūbin ke qabile kā yih sardār 30 faujiyoṇ par muqarrar thā), ⁴³ Hanān bin Mākā, Yūsafat Mitnī, ⁴⁴ Uzziyāh Astarātī, Khūtām Aroīrī ke beṭe Samā aur Ya'iyeļ, ⁴⁵ Yadiyael bin Simrī, us kā bhāī Yūkhā Tīsī, ⁴⁶ Iliyel Mahāwī, Ilnām ke beṭe Yarībī aur Yūsāwiyāh, Yitmā Moābī, ⁴⁷ Iliyel, Obed aur Yāsiyeļ Mazobāī.

12

Sāūl ke Daur-e-Hukumat mein Dāūd ke Pairokār

¹ Zail ke ādmī Siqlāj meñ Dāūd ke sāth mil gae. Us waqt jab wuh Sāūl bin Qīs se chhipā rahtā thā. Yih un faujiyon meñ se the jo jang meñ Dāūd ke sāth mil kar lārte the ² aur behtarīn tīrandāz the, kyoñki yih na sirf dahne balki bāen hāth se bhī mahārat se tīr aur falākhan kā patthar chalā sakte the. In ādmīyon meñ se darje-e-zail Binyamīn ke qabīle aur Sāūl ke қhāndān se the.

³ Un kā rāhnumā Akhiyazar, phir Yuās (donoñ Samā'āh Jibiyātī ke bete the), Yaziyal aur Falat (donoñ Azmāwat ke bete the), Barākā, Yāhū Anatotī, ⁴ Ismāyāh Jibaūnī jo Dāūd ke 30 afsaroñ kā ek sūrmā aur līḍar thā, Yarmiyāh, Yahziyal, Yūhanān, Yūzabad Jadīrātī, ⁵ Iliūzī, Yarīmot, Bāliyāh, Samariyāh aur Safatiyāh Қharūfī.

⁶ Qorah ke қhāndān meñ se Ilqānā, Yissiyāh, Azarel, Yuazar aur Yasūbiyām Dāūd ke sāth the.

⁷ In ke alāwā Yarohām Jadūrī ke bete Yūlā aur Zabadiyāh bhī the.

⁸ Jad ke qabīle se bhī kuchh bahādur aur tajrabākār faujī Sāūl se alag ho kar Dāūd ke sāth mil gae jab wuh registān ke qile meñ thā. Yih mard mahārat se dhāl aur nezā istemāl kar sakte the. Un ke chehre sherbabar ke chehron kī mānind the, aur wuh pahārī ilāqe meñ ғhazālon kī tarah tez chal sakte the.

⁹ Un kā līḍar Azar zail ke das ādmīyon par muqarrar thā: Abadiyāh, Iliyāb, ¹⁰ Mismannā,

Yarmiyāh, ¹¹ Attī, Iliyel, ¹² Yūhanān, Ilzabad,
¹³ Yarmiyāh aur Makbannī.

¹⁴ Jad ke yih mard sab ālā faujī afsar ban gae. Un meñ se sab se kamzor ādmī sau ām faujiyon kā muqābalā kar saktā thā jabki sab se tāqatwar ādmī hazār kā muqābalā kar saktā thā. ¹⁵ Inhīn ne bahār ke mausam meñ Dariyā-e-Yardan ko pār kiyā, jab wuh kināron se bāhar ā gayā thā, aur mashriq aur mağhrib kī wādiyon ko band kar rakhā.

¹⁶ Binyamīn aur Yahūdāh ke qabiloṇ ke kuchh mard Dāūd ke pahārī qile meñ āe. ¹⁷ Dāūd bāhar nikal kar un se milne gayā aur pūchhā, “Kyā āp salāmatī se mere pās āe haiñ? Kyā āp merī madad karnā chāhte haiñ? Agar aisā hai to maiñ āp kā achchhā sāthī rahūngā. Lekin agar āp mujhe dushmanoṇ ke hawāle karne ke lie āe haiñ hālānki mujh se koī bhī zulm nahīn huā hai to hamāre bāpdādā kā Khudā ise dekh kar āp ko sazā de.”

¹⁸ Phir Rūhul-quds 30 afsaroṇ ke rāhnumā Amāsī par nāzil huā, aur us ne kahā, “Ai Dāūd, ham tere hī log haiñ. Ai Yassī ke betē, ham tere sāth haiñ. Salāmatī, salāmatī tujhe hāsil ho, aur salāmatī unheñ hāsil ho jo terī madad karte haiñ. Kyoñki terā Khudā terī madad karegā.” Yih sun kar Dāūd ne unheñ qabūl karke apne chhāpāmār dastoṇ par muqarrar kiyā.

¹⁹ Manassī ke qabile ke kuchh mard bhī Sāūl se alag ho kar Dāūd ke pās āe. Us waqt wuh Filistiyon ke sāth mil kar Sāūl se laṛne jā rahā thā, lekin bād meñ use maidān-e-jang meñ āne kī ijāzat na milī. Kyoñki Filistī sardāron ne āpas

meñ mashwarā karne ke bād use yih kah kar wāpas bhej diyā ki ɭhatrā hai ki yih hameñ maidān-e-jang meñ chhoṛ kar apne purāne mālik Sāūl se dubārā mil jāe. Phir ham tabāh ho jāēnge.

²⁰ Jab Dāūd Siqlāj wāpas jā rahā thā to Manassī ke qabīle ke darj-e-zail afsar Sāūl se alag ho kar us ke sāth ho lie: Adnā, Yūzabad, Yadiyael, Mīkāel, Yūzabad, Iīhū aur Zillatī. Manassī meñ har ek ko hazār hazār faujiyon par muqarrar kiyā gayā thā. ²¹ Unhoñ ne lūtne wāle Amāliqī daston̄ ko pakarne meñ Dāūd kī madad kī, kyoñki wuh sab diler aur qābil faujī the. Sab us kī fauj meñ afsar ban gae.

²² Roz baroz log Dāūd kī madad karne ke lie āte rahe, aur hote hote us kī fauj Allāh kī fauj jaisī barī ho gaī.

Habrūn meñ Dāūd kī Fauj

²³ Darj-e-zail un tamām faujiyon kī fahrist hai jo Habrūn meñ Dāūd ke pās āe tāki use Sāūl kī jagah bādshāh banāeñ, jis tarah Rab ne hukm diyā thā.

²⁴ Yahūdāh ke qabīle ke ḏhāl aur neze se lais 6,800 mard the.

²⁵ Shamāūn ke qabīle ke 7,100 tajrabākār faujī the.

²⁶ Lāwī ke qabīle ke 4,600 mard the. ²⁷ Un meñ Hārūn ke ɭhāndān kā sarparast Yahoyadā bhī shāmil thā jis ke sāth 3,700 ādmī the. ²⁸ Sadoq nāmī ek diler aur jawān faujī bhī shāmil thā. Us ke sāth us ke apne ɭhāndān ke 22 afsar the.

²⁹ Sāūl ke qabīle Binyamīn ke bhī 3,000 mard the, lekin is qabīle ke aksar faujī ab tak Sāūl ke khāndān ke sāth liptē rahe.

³⁰ Ifrāīm ke qabile ke 20,800 faujī the. Sab apne khāndānoṇ meṇ asar-o-rasūkh rakhne wāle the.

³¹ Manassī ke ādhe qabīle ke 18,000 mard the. Unheṇ Dāūd ko bādshāh banāne ke lie chun liyā gayā thā.

³² Ishkār ke qabīle ke 200 afsar apne dastoṇ ke sāth the. Yih log waqt kī zarūrat samajh kar jānte the ki Isrāīl ko kyā karnā hai.

³³ Zabūlūn ke qabīle ke 50,000 tajrabākār faujī the. Wuh har hathiyār se lais aur pūrī wafādārī se Dāūd ke lie larne ke lie taiyār the.

³⁴ Naftālī ke qabīle ke 1,000 afsar the. Un ke taht ḏhāl aur neze se musallah 37,000 ādmī the.

³⁵ Dān ke qabīle ke 28,600 mard the jo sab larne ke lie musta'id the.

³⁶ Ashar ke qabīle ke 40,000 mard the jo sab larne ke lie taiyār the.

³⁷ Dariyā-e-Yardan ke mashriq meṇ ābād qabiloṇ Rūbin, Jad aur Manassī ke ādhe hisse ke 1,20,000 mard the. Har ek har qism ke hathiyār se lais thā.

³⁸ Sab tartīb se Habrūn āe tāki pūre azm ke sāth Dāūd ko pūre Isrāīl kā bādshāh banāeṇ. Bāqī tamām Isrāīlī bhī muttafiq the ki Dāūd hamārā bādshāh ban jāe. ³⁹ Yih faujī tīn din tak Dāūd ke pās rahe jis daurān un ke qabāylī bhāī unheṇ khāne-pīne kī chīzeṇ muhaiyā karte rahe. ⁴⁰ Qarīb ke rahne wāloṇ ne bhī is meṇ un kī madad kī. Ishkār, Zabūlūn aur Naftālī tak ke log apne gadhoṇ, ūnṭoṇ, khachcharoṇ aur bailoṇ

par khāne kī chīzeñ lād kar wahān pahuñche. Maidā, anjir aur kishmish kī tikkīyān, mai, tel, bail aur bheñ-bakriyān barī miqdār men̄ Habrūn lāi gañ, kyoñki tamām Isrāilī khushī manā rahe the.

13

Dāūd Ahd kā Sandūq Yarūshalam meñ Lānā Chāhtā Hai

¹ Dāūd ne tamām afsaroñ se mashwarā kiyā. Un men̄ hazār hazār aur sau sau faujioñ par muqarrar afsar shāmil the. ² Phir us ne Isrāil kī pūrī jamāt se kahā, “Agar āp ko manzūr ho aur Rab hamāre Khudā kī marzī ho to āeñ ham pūre mulk ke Isrāilī bhāiyoñ ko dāwat deñ ki ā kar hamāre sāth jamā ho jāeñ. Wuh imām aur Lāwī bhī sharīk hoñ jo apne apne shahroñ aur charāgāhoñ meñ baste haiñ. ³ Phir ham apne Khudā ke ahd kā sandūq dubārā apne pās wāpas lāeñ, kyoñki Sāūl ke daur-e-hukūmat meñ ham us kī fikr nahīn karte the.”

⁴ Pūrī jamāt muttafiq huī, kyoñki yih mansūbā sab ko durust lagā. ⁵ Chunāñche Dāūd ne pūre Isrāil ko junūb meñ Misr ke Saihūr se le kar shimāl meñ Labo-hamāt tak bulāyā tāki sab mil kar Allāh ke ahd kā sandūq Qiriyat-yārīm se Yarūshalam le jāeñ. ⁶ Phir wuh un ke sāth Yahūdāh ke Bālā yānī Qiriyat-yārīm gayā tāki Rab Khudā kā sandūq uṭhā kar Yarūshalam le jāeñ, wuhī sandūq jis par Rab ke nām kā thappā lagā hai aur jahān wuh sandūq ke ūpar karūbī farishtoñ ke darmiyān taķhtnashīn hai. ⁷ Qiriyat-yārīm pahuñch kar logoñ ne Allāh ke

sandūq ko Abīnadāb ke ghar se nikāl kar ek naī bailgāṛī par rakh diyā, aur Uzzā aur Akhiyo use Yarūshalam kī taraf le jāne lage. ⁸ Dāūd aur tamām Isrāīlī gāṛī ke pīchhe chal paṛe. Sab Allāh ke huzūr pūre zor se khushī manāne lage. Jūnīpar kī lakarī ke mukhtalif sāz bhī bajāe jā rahe the. Fizā sitāroṇ, sarodoṇ, dafoṇ, jhānjhoṇ aur turamoṇ kī āwāzoṇ se gūnj uṭhī.

⁹ Wuh gandum gāhne kī ek jagah par pahuñch gae jis ke mālik kā nām Kaidūn thā. Wahān bail achānak beqābū ho gae. Uzzā ne jaldī se ahd kā sandūq pakar liyā taki wuh gir na jāe. ¹⁰ Usī lamhe Rab kā ghazab us par nāzil huā, kyoṇki us ne ahd ke sandūq ko chhūne kī jurrat kī thī. Wahān Allāh ke huzūr Uzzā gir kar halāk huā. ¹¹ Dāūd ko baṛā ranj huā ki Rab kā ghazab Uzzā par yoṇ tūṭ paṛā hai. Us waqt se us jagah kā nām Paraz-uzzā yānī ‘Uzzā par Tūṭ Paṛnā’ hai.

¹² Us din Dāūd ko Allāh se Ḳhauf āyā. Us ne sochā, “Maiñ kis tarah Allāh kā sandūq apne pās pahuñchā sakūngā?” ¹³ Chunāñche us ne faisłā Ḳiyā ki ham ahd kā sandūq Yarūshalam nahīn le jāenge balki use Obed-adom jātī ke ghar meñ mahfūz rakheñge. ¹⁴ Wahān wuh tīn māh tak paṛā rahā. In tīn mahīnoṇ ke daurān Rab ne Obed-adom ke gharāne aur us kī pūrī milkiyat ko barkat dī.

14

Dāūd kī Taraqqī

¹ Ek din Sūr ke bādshāh Hīrām ne Dāūd ke pās wafd bhejā. Rāj aur baṛhaī bhī sāth the. Un ke

pās deodār kī lakaṛī thī tāki Dāūd ke lie mahal banāeñ. ² Yoñ Dāūd ne jān liyā ki Rab ne mujhe Isrāīl kā bādshāh banā kar merī bādshāhī apnī qaum Isrāīl kī khātir bahut sarfarāz kar dī hai.

³ Yarūshalam meñ jā basne ke bād Dāūd ne mazīd shādiyān kīn. Natīje meñ Yarūshalam meñ us ke kaī betē-betiyān paidā hue. ⁴ Jo betē wahān paidā hue wuh yih the: Sammua, Sobāb, Nātan, Sulemān, ⁵ Ibhār, Ilisua, Ilfalat, ⁶ Naujā, Nafaj, Yafīa, ⁷ Ilīsamā, Bāl-yadā aur Ilīfalat.

Filistiyon par Fatah

⁸ Jab Filistiyon ko ittalā milī ki Dāūd ko masah karke Isrāīl kā bādshāh banāyā gayā hai to unhoñ ne apne faujiyon ko Isrāīl meñ bhej diyā tāki use pakaṛ leñ. Jab Dāūd ko patā chal gayā to wuh un kā muqābalā karne ke lie gayā. ⁹ Jab Filistī Isrāīl meñ pahuñch kar Wādī-e-Rafāīm meñ phail gae ¹⁰ to Dāūd ne Rab se dariyāft kiyā, “Kyā maiñ Filistiyon par hamlā karūn? Kyā tū mujhe un par fatah baķhshegā?” Rab ne jawāb diyā, “Hān, un par hamlā kar! Maiñ unheñ tere qabze meñ kar dūngā.” ¹¹ Chunāñche Dāūd apne faujiyon ko le kar Bāl-parāzīm gayā. Wahān us ne Filistiyon ko shikast dī. Bād meñ us ne gawāhī dī, “Jitne zor se band ke tūt jāne par pānī us se phūṭ nikaltā hai utne zor se āj Allāh mere wasile se dushman kī safon meñ se phūṭ niklā hai.” Chunāñche us jagah kā nām Bāl-parāzīm yānī ‘Phūṭ Nikalne kā Mālik’ paṛ gayā. ¹² Filistī apne dewatāoñ ko chhoṛ kar bhāg gae. Aur Dāūd ne unheñ jalā dene kā hukm diyā.

¹³ Ek bār phir Filistī ā kar Wādī-e-Rafāīm meñ phail gae. ¹⁴ Is dafā jab Dāūd ne Allāh se dariyāft kiyā to us ne jawāb diyā, “Is martabā un kā sāmnā mat karnā balki un ke pīchhe jā kar bakā ke darakhtoñ ke sāmne un par hamlā kar. ¹⁵ Jab un darakhtoñ kī choṭiyon se qadmoñ kī chāp sunāī de to ķhabardār! Yih is kā ishārā hogā ki Allāh khud tere āge āge chal kar Filistiyoñ ko mārne ke lie nikal āyā hai.” ¹⁶ Dāūd ne aisā hī kiyā aur natīje meñ Filistiyoñ ko shikast de kar Jibaūn se le kar Jazar tak un kā tāqqub kiyā.

¹⁷ Dāūd kī shohrat tamām mamālik meñ phail gaī. Rab ne tamām qaumoñ ke dilon meñ Dāūd kā ķhauf ɖāl diyā.

15

Yarūshalam meñ Ahd ke Sandūq ke lie Taiyāriyān

¹ Yarūshalam ke us hisse meñ jis kā nām ‘Dāūd kā Shahr’ par gayā thā Dāūd ne apne lie chand imārateñ banwāīn. Us ne Allāh ke sandūq ke lie bhī ek jagah taiyār karke wahān ķhaimā lagā diyā. ² Phir us ne hukm diyā, “Siwāe Lāwiyoñ ke kisī ko bhī Allāh kā sandūq uṭhāne kī ijāzat nahīn. Kyoñki Rab ne inhīn ko Rab kā sandūq uṭhāne aur hameshā ke lie us kī ķhidmat karne ke lie chun liyā hai.”

³ Is ke bād Dāūd ne tamām Isrāīl ko Yarūshalam bulāyā tāki wuh mil kar Rab kā sandūq us jagah le jāeñ jo us ne us ke lie taiyār kar rakhī thī. ⁴ Bādshāh ne Hārūn aur

bāqī Lāwiyoṇ kī aulād ko bhī bulāyā. ⁵ Darj-e-zail un Lāwī sarparastoṇ kī fahrist hai jo apne rishtedāroṇ ko le kar āe.

Qihāt ke ƙhāndān se Ūriyel 120 mardoṇ samet,

⁶ Mirārī ke ƙhāndān se Asāyāh 220 mardoṇ samet,

⁷ Jairsom ke ƙhāndān se Yoel 130 mardoṇ samet,

⁸ Ilīsafan ke ƙhāndān se Samāyāh 200 mardoṇ samet,

⁹ Habrūn ke ƙhāndān se Iliyel 80 mardoṇ samet,

¹⁰ Uzziyel ke ƙhāndān se Ammīnadāb 112 mardoṇ samet.

¹¹ Dāūd ne donoṇ imāmoṇ Sadoq aur Abiyātar ko mazkūrā chhih Lāwī sarparastoṇ samet apne pās bulā kar ¹² un se kahā, “Āp Lāwiyoṇ ke sarbarāh haiñ. Lāzim hai ki āp apne qabāylī bhāiyoṇ ke sāth apne āp ko makhsūs-o-muqaddas karke Rab Isrāīl ke Ƙhudā ke sandūq ko us jagah le jāen jo maiñ ne us ke lie taiyār kar rakhī hai. ¹³ Pahlī martabā jab ham ne use yahāñ lāne kī koshish kī to yih āp Lāwiyoṇ ke zariye na huā, is lie Rab hamāre Ƙhudā kā qahr ham par tūṭ paṛā. Us waqt ham ne us se dariyāft nahīn kiyā thā ki use uṭhā kar le jāne kā kyā munāsib tarīqā hai.” ¹⁴ Tab imāmoṇ aur Lāwiyoṇ ne apne āp ko makhsūs-o-muqaddas karke Rab Isrāīl ke Ƙhudā ke sandūq ko Yarūshalam lāne ke lie taiyār kiyā. ¹⁵ Phir Lāwī Allāh ke sandūq ko uṭhāne kī lakaṛiyoṇ se apne kandhoṇ par yon hī rakh kar chal paṛē jis tarah Mūsā ne Rab ke kalām ke mutābiq farmāyā thā.

16 Dāūd ne Lāwī sarbarāhoṇ ko yih hukm bhī diyā, “Apne qabile meṇ se aise ādmiyoṇ ko chun leṇ jo sáz, sitār, sarod aur jhānjh bajāte hue kħushī ke gīt gāeṇ.” **17** Us zimmedārī ke lie Lāwiyoṇ ne zail ke ādmiyoṇ ko muqarrar kiyā: Haimān bin Yoel, us kā bhāī Āsaf bin Barakiyāh aur Mirārī ke ķhāndān kā Aitān bin Kausāyāh. **18** Dūsre maqām par un ke yih bhāī āe: Zakariyāh, Yāziyel, Samīrāmot, Yihiyel, Unnī, Iliyāb, Bināyāh, Māsiyāh, Mattitiyāh, Ilīfalehū, Miqniyāh, Obed-adom aur Ya'iyel. Yih darbān the. **19** Haimān, Āsaf aur Aitān gulūkār the, aur unheṇ pītal ke jhānjh bajāne kī zimmedārī dī gaī. **20** Zakariyāh, Aziyel, Samīrāmot, Yihiyel, Unnī, Iliyāb, Māsiyāh aur Bināyāh ko alāmūt ke tarz par sitār bajānā thā. **21** Mattitiyāh, Ilīfalehū, Miqniyāh, Obed-adom, Ya'iyel aur Azaziyāh ko Shamīnīt ke tarz par sarod bajāne ke lie chunā gayā.

22 Kananiyāh ne Lāwiyoṇ kī kwāir kī rāhnumāī kī, kyoṇki wuh is meṇ māhir thā.

23-24 Barakiyāh, Ilqānā, Obed-adom aur Yahiyāh ahd ke sandūq ke darbān the. Sabaniyāh, Yūsafat, Nataniyel, Amāsī, Zakariyāh, Bināyāh aur Iliyazar ko turam bajā kar Allāh ke sandūq ke āge āge chalne kī zimmedārī dī gaī. Sātoṇ imām the.

Dāūd Ahd kā Sandūq Yarūshalam meṇ Le Ātā Hai

25 Phir Dāūd, Isrāīl ke buzurg aur hazār hazār faujiyoṇ par muqarrar afsar kħushī manātē hue nikal kar Obed-adom ke ghar gae tāki Rab ke

ahd kā sandūq wahān se le kar Yarūshalam pahuñchāeñ. ²⁶ Jab zāhir huā ki Allāh ahd ke sandūq ko uñhāne wāle Lāwiyon kī madad kar rahā hai to sāt jawān sāndoñ aur sāt mendhoñ ko qurbān kiyā gayā. ²⁷ Dāūd bārik katān kā libās pahne hue thā, aur is tarah ahd kā sandūq uñhāne wāle Lāwī, gulukār aur kwāir kā līdar kananiyāh bhī. Is ke alāwā Dāūd katān kā bālāposh pahne hue thā. ²⁸ Tamām Isrāīlī khushī ke nāre lagā lagā kar, narsinge aur turam phūnk phūnk kar aur jhānjh, sitār aur sarod bajā bajā kar Rab ke ahd kā sandūq Yarūshalam lāe.

²⁹ Rab kā ahd kā sandūq Dāūd ke shahr meñ dākhlil huā to Dāūd kī bīwī Mīkal bint Sāūl khirkī meñ se julūs ko dekh rahī thī. Jab bādshāh kūdtā aur nāchtā huā nazar āyā to Mīkal ne use haqīr jānā.

16

¹ Allāh kā sandūq us tambū ke darmiyān meñ rakhā gayā jo Dāūd ne us ke lie lagwāyā thā. Phir unhoñ ne Allāh ke huzūr bhasm hone wāli aur salāmatī kī qurbāniyān pesh kīn. ² Is ke bād Dāūd ne qaum ko Rab ke nām se barkat de kar ³ har Isrāīlī mard aur aurat ko ek rotī, khajūr kī ek tikkī aur kishmish kī ek tikkī de dī. ⁴ Us ne kuchh Lāwiyon ko Rab ke sandūq ke sāmne khidmat karne kī zimmedārī dī. Unheñ Rab Isrāīl ke Khudā kī tamjīd aur hamd-o-sanā karnī thī. ⁵ Un kā sarbarāh Āsaf jhānjh bajatā thā. Us kā nāyb Zakariyāh thā. Phir Ya'iyel, Samīrāmot, Yihiyel, Mattitiyāh, Iliyāb, Bināyāh, Obed-adom aur Ya'iyel the jo sitār aur sarod

bajāte the. ⁶ Bināyāh aur Yahziyel Imāmoṇ kī zimmedārī Allāh ke ahd ke sandūq ke sāmne turam bajānā thī.

Shukr kā Gīt

⁷ Us din Dāūd ne pahlī dafā Āsaf aur us ke sāthī Lāwiyoṇ ke hawāle zail kā gīt karke unheṇ Rab kī satāish karne kī zimmedārī dī.

⁸ “Rab kā shukr karo aur us kā nām pukāro! Aqwām meṇ us ke kāmoṇ kā elān karo.

⁹ Sāz bajā kar us kī madahsarāī karo. Us ke tamām ajāyb ke bāre meṇ logoṇ ko batāo.

¹⁰ Us ke muqaddas nām par faķhr karo. Rab ke tālib dil se khush hoṇ.

¹¹ Rab aur us kī qudrat kī dariyāft karo, har waqt us ke chehre ke tālib raho.

¹² Jo mojize us ne kie unheṇ yād karo. Us ke ilāhī nishān aur us ke muṇh ke faisle dohrāte raho.

¹³ Tum jo us ke khādim Isrāīl kī aulād aur Yāqūb ke farzand ho, jo us ke barguzidā log ho, tumheṇ sab kuchh yād rahe!

¹⁴ Wuhī Rab hamārā Khudā hai, wuhī pūrī duniyā kī adālat kartā hai.

¹⁵ Wuh hameshā apne ahd kā khayāl rakhtā hai, us kalām kā jo us ne hazār pushton ke lie farmāyā thā.

¹⁶ Yih wuh ahd hai jo us ne Ibrāhīm se bāndhā, wuh wādā jo us ne qasam khā kar Is'hāq se kiyā thā.

17 Us ne use Yāqūb ke lie qāym kiyā tāki wuh us ke mutābiq zindagī guzāre, us ne tasdīq kī ki yih merā Isrāīl se abadī ahd hai.

18 Sāth sāth us ne farmāyā, ‘Maiñ tujhe Mulk-e-Kanān dūngā. Yih terī mīrās kā hissā hogā.’

19 Us waqt wuh tādād meñ kam aur thoře hī the balki mulk meñ ajnabī hī the.

20 Ab tak wuh mukhtalif qaumoñ aur saltanatoñ meñ ghūmte-phirte the.

21 Lekin Allāh ne un par kisī ko zulm karne na diyā, aur un kī khātit us ne bādshāhoñ ko dāntā,

22 ‘Mere masah kie hue khādimoñ ko mat chherñā, mere nabiyoñ ko nuqsān mat pahuñchānā.’

23 Ai pūrī duniyā, Rab kī tamjīd meñ gīt gā! Roz baroz us kī najāt kī khushkhabrī sunā.

24 Qaumoñ meñ us kā jalāl aur tamām ummaton meñ us ke ajāyb bayān karo.

25 Kyōñki Rab azīm aur satāish ke bahut lāyq hai. Wuh tamām mābūdoñ se mahīb hai.

26 Kyōñki dīgar qaumoñ ke tamām mābūd but hī haiñ jabki Rab ne āsmān ko banāyā.

27 Us ke huzūr shāñ-o-shaukat, us kī sukūnatgāh meñ qudrat aur jalāl hai.

28 Ai qaumoñ ke qabīlo, Rab kī tamjīd karo, Rab ke jalāl aur qudrat kī satāish karo.

29 Rab ke nām ko jalāl do. Qurbānī le kar us ke huzūr āo. Muqaddas libās se ārāstā ho kar Rab ko sijdā karo.

30 Pūrī duniyā us ke sāmne laraz uṭhe. Yaqīnan duniyā mazbūtī se qāym hai aur nahīn ḏagmagāegī.

31 Āsmān shādmān ho, aur zamīn jashn manāe. Qaumōn meṁ kahā jāe ki Rab Bādshāh hai.

32 Samundar aur jo kuchh us meṁ hai khushī se garaj uṭhe, maidān aur jo kuchh us meṁ hai bāgh bāgh ho.

33 Phir jangal ke darakht Rab ke sāmne shādiyānā bajāēnge, kyoñki wuh ā rahā hai, wuh zamīn kī adālat karne ā rahā hai.

34 Rab kā shukr karo, kyoñki wuh bhalā hai, aur us kī shafqat abadī hai.

35 Us se iltamās karo, ‘Ai hamārī najāt ke Khudā, hameñ bachā! Hameñ jamā karke dīgar qaumōn ke hāth se chhuṛā. Tab hī ham tere muqaddas nām kī satāish kareñge aur tere qābil-e-tārif kāmoñ par fakhr kareñge.’

36 Azal se abad tak Rab, Isrāil ke Khudā kī hamd ho!”

Tab pūrī qaum ne “Āmīn” aur “Rab kī hamd ho” kahā.

Lāwiyoñ kī Zimmedāriyāñ

37 Dāūd ne Āsaf aur us ke sāthī Lāwiyoñ ko Rab ke ahd ke sandūq ke sāmne chhoṛ kar kahā, “Āindā yahāñ bāqāydagī se rozānā kī zarūrī khidmat karte jāeñ.”

38 Is guroh meñ Obed-adom aur mazīd 68 Lāwī shāmil the. Obed-adom bin Yadūtūn aur Hūsā darbān ban gae.

³⁹ Lekin Sadoq Imām aur us ke sāthī imāmon ko Dāūd ne Rab kī us sukūnatgāh ke pās chhoṛ diyā jo Jibaūn kī pahārī par thī. ⁴⁰ Kyonki lāzim thā ki wuh wahān har subah aur shām ko bhasm hone wālī qurbāniyān pesh karen aur bāqī tamām hidāyat par amal karen jo Rab kī taraf se Isrāil ke lie sharīat meṇ bayān kī gaī haiñ. ⁴¹ Dāūd ne Haimān, Yadūtūn aur mazīd kuchh chīdā Lāwiyon ko bhī Jibaūn meṇ un ke pās chhoṛ diyā. Wahān un kī khās zimmedārī Rab kī hamd-o-sanā karnā thī, kyonki us kī shafqat abadī hai. ⁴² Un ke pās turam, jhānjh aur bāqī aise sāz the jo Allāh kī tārif meṇ gāe jāne wāle gīton ke sāth bajāe jāte the. Yadūtūn ke beṭoṇ ko darbān banāyā gayā.

⁴³ Jashn ke bād sab log apne apne ghar chale gae. Dāūd bhī apne ghar lauṭā tāki apne khāndān ko barkat de kar salām kare.

17

Rab Dāūd ke lie Abadī Bādshāhī kā Wādā Kartā Hai

¹ Dāūd Bādshāh salāmatī se apne mahal meṇ rahne lagā. Ek din us ne Nātan Nabī se bāt kī, “Dekheñ, maiñ yahān deodār ke mahal meṇ rahtā hūn jabki Rab ke ahd kā sandūq ab tak tambū meṇ paṛā hai. Yih munāsib nahīn!” ² Nātan ne bādshāh kī hauslā-afzāī kī, “Jo kuchh bhī āp karnā chāhte haiñ wuh karen. Allāh āp ke sāth hai.”

³ Lekin usī rāt Allāh Nātan se hamkalām huā, ⁴ “Mere khādim Dāūd ke pās jā kar use batā de ki Rab farmātā hai, ‘Tū merī rihāish ke lie

makān tāmīr nahīn karegā. ⁵ Āj tak maiñ kisī makān meñ nahīn rahā. Jab se maiñ Isrāiliyon ko Misr se nikāl lāyā us waqt se maiñ ƙhaime meñ rah kar jagah bajagah phirtā rahā hūn. ⁶ Jis daurān maiñ tamām Isrāiliyon ke sāth idhar-udhar phirtā rahā kyā maiñ ne Isrāīl ke un rāhnumāoñ se kabhī is nāte se shikāyat kī jinheñ maiñ ne apnī qaum kī gallābānī karne kā hukm diyā thā? Kyā maiñ ne un meñ se kisī se kahā ki tum ne mere lie deodār kā ghar kyoñ nahīn banāyā?

⁷ Chunānche mere khādim Dāūd ko batā de, ‘Rabbul-afwāj farmātā hai ki maiñ hī ne tujhe charāgāh meñ bheṛoñ kī gallābānī karne se fāriġh karke apnī qaum Isrāīl kā bādshāh banā diyā hai. ⁸ Jahān bhī tū ne qadam rakhā wahān maiñ tere sāth rahā hūn. Tere dekhte dekhte maiñ ne tere tamām dushmanoñ ko halāk kar diyā hai. Ab main terā nām sarfarāz kar dūngā, wuh duniyā ke sab se azīm ādmiyoñ ke nāmoñ ke barābar hī hogā. ⁹ Aur maiñ apnī qaum Isrāīl ke lie ek watan muhaiyā karūṅga, paude kī tarah unheñ yoñ lagā dūngā ki wuh jaṛ pakar kar mahfūz raheṅge aur kabhī bechain nahīn hoṅge. Bedīn qaumeñ unheñ us tarah nahīn dabāeṅgī jis tarah māzī meñ kiyā kartī thīn, ¹⁰ us waqt se jab maiñ qaum par qāzī muqarrar kartā thā. Maiñ tere dushmanoñ ko khāk meñ milā dūngā. Āj maiñ farmātā hūn ki Rab hī tere lie ghar banāegā. ¹¹ Jab tū būṛhā ho kar kūch kar jāegā aur apne bāpdādā se jā milegā to maiñ terī jagah tere beṭoñ meñ se ek ko taḳht par biṭhā dūngā. Us kī bādshāhī ko maiñ mazbūt

banā dūṅgā. ¹² Wuhī mere lie ghar tāmīr karegā, aur maiñ us kā takht abad tak qāym rakhūngā. ¹³ Maiñ us kā bāp hūngā aur wuh merā betā hogā. Merī nazar-e-karm Sāūl par na rahī, lekin maiñ use tere bete se kabhī nahīn haṭāūngā. ¹⁴ Maiñ use apne gharāne aur apnī bādshāhī par hameshā qāym rakhūngā, us kā takht hameshā mazbūt rahegā.’”

Dāūd kī Shukrguzārī

¹⁵ Nātan ne Dāūd ke pās jā kar use sab kuchh sunāyā jo Rab ne use royā meñ batāyā thā. ¹⁶ Tab Dāūd ahd ke sandūq ke pās gayā aur Rab ke huzūr baiṭh kar duā karne lagā,

“Ai Rab Khudā, maiñ kaun hūn aur merā khāndān kyā haisiyat rakhtā hai ki tū ne mujhe yahān tak pahuinchāyā hai? ¹⁷ Aur ab ai Allāh, tū mujhe aur bhī zyādā atā karne ko hai, kyoñki tū ne apne khādim ke gharāne ke mustaqbil ke bāre meñ bhī wādā kiyā hai. Ai Rab Khudā, tū ne yoñ mujh par nigāh ḥālī hai goyā ki maiñ koī bahut aham bandā hūn. ¹⁸⁻¹⁹ Lekin maiñ mazid kyā kahūn jab tū ne yoñ apne khādim kī izzat kī hai? Ai Rab, tū to apne khādim ko jāntā hai. Tū ne apne khādim kī khātir aur apnī marzī ke mutābiq yih azīm kām karke in azīm wādon kī ittalā dī hai.

²⁰ Ai Rab, tujh jaisā koī nahīn hai. Ham ne apne kānoñ se sun liyā hai ki tere siwā koī aur Khudā nahīn hai. ²¹ Duniyā meñ kaun-sī qaum terī ummat Isrāīl kī mānind hai? Tū ne isī ek qaum kā fidyā de kar use ḡhulāmī se chhuṛāyā aur apnī qaum banā liyā. Tū ne Isrāīl ke wāste bare aur haibatnāk kām karke apne nām kī

shohrat phailā dī. Hameñ Misr se rihā karke tū ne qaumon̄ ko hamāre āge se nikāl diyā. ²² Ai Rab, tū Isrāīl ko hameshā ke lie apnī qaum banā kar un kā Khudā ban gayā hai.

²³ Chunāñche ai Rab, jo bāt tū ne apne khādim aur us ke gharāne ke bāre meñ kī hai use abad tak qāym rakh aur apnā wādā pūrā kar. ²⁴ Tab wuh mazbūt rahegā aur terā nām abad tak mashhūr rahegā. Phir log taslīm kareñge ki Isrāīl kā Khudā Rabbul-afwāj wāqaī Isrāīl kā Khudā hai, aur tere khādim Dāūd kā gharānā bhī abad tak tere huzūr qāym rahegā. ²⁵ Ai mere Khudā, tū ne apne khādim ke kān ko is bāt ke lie khol diyā hai. Tū hī ne farmāyā, ‘Main tere lie ghar tāmīr karūn̄ga.’ Sirf isī lie tere khādim ne yoñ tujh se duā karne kī jurrat kī hai. ²⁶ Ai Rab, tū hī Khudā hai. Tū ne apne khādim se in achchhī chīzoñ kā wādā kiyā hai. ²⁷ Ab tū apne khādim ke gharāne ko barkat dene par rāzī ho gayā hai tāki wuh hameshā tak tere sāmne qāym rahe. Kyoñki tū hī ne use barkat dī hai, is lie wuh abad tak mubārak rahegā.”

18

Dāūd kī Jangen̄

¹ Phir aisā waqt āyā ki Dāūd ne Filistiyon̄ ko shikast de kar unheñ apne tābe kar liyā aur Jāt Shahr par gird-o-nawāh kī ābādiyon̄ samet qabzā kar liyā.

² Us ne Moābiyoñ par bhī fatah pāī, aur wuh us ke tābe ho kar use ƙharāj dene lāge.

³ Dāūd ne shimālī Shām ke shahr Zobāh ke bādshāh Hadadazar ko bhī Hamāt ke qarib harā diyā jab Hadadazar Dariyā-e-Furāt par qābū pāne ke lie nikal āyā thā. ⁴ Dāūd ne 1,000 rathoṇ, 7,000 ghursawāroṇ aur 20,000 piyādā sipāhiyoṇ ko giriftār kar liyā. Rathoṇ ke 100 ghorōṇ ko us ne apne lie mahfūz rakhā jabki bāqiyōṇ kī us ne koñcheṇ kāt dīn tāki wuh āindā jang ke lie istemāl na ho sakeṇ.

⁵ Jab Damishq ke Arāmī bāshinde Zobāh ke bādshāh Hadadazar kī madad karne āe to Dāūd ne un ke 22,000 afrād halāk kar die. ⁶ Phir us ne Damishq ke ilāqe meñ apnī faujī chaukiyān qāym kīn. Arāmī us ke tābe ho gae aur use kharāj dete rahe. Jahān bhī Dāūd gayā wahān Rab ne use kāmyābī bakhsī. ⁷ Sone kī jo dhālen Hadadazar ke afsaroṇ ke pās thiṇ unheṇ Dāūd Yarūshalam le gayā. ⁸ Hadadazar ke do shahroṇ Kūn aur Tibkhat se us ne kasrat kā pītal chhīn liyā. Bād meñ Sulemān ne yih pītal Rab ke ghar meñ ‘Samundar’ nāmī pītal kā hauz, satūn aur pītal kā mukhtalif sāmān banāne ke lie istemāl kiyā.

⁹ Jab Hamāt ke bādshāh Tūī ko ittalā milī ki Dāūd ne Zobāh ke bādshāh Hadadazar kī pūrī fauj par fatah pāī hai ¹⁰ to us ne apne betē Hadūrām ko Dāūd ke pās bhejā tāki use salām kahe. Hadūrām ne Dāūd ko Hadadazar par fatah ke lie mubārakbād dī, kyoñki Hadadazar Tūī kā dushman thā, aur un ke darmiyān jang rahī thi. Hadūrām ne Dāūd ko sone, chāndī aur pītal ke bahut-se tohfe bhī pesh kie. ¹¹ Dāūd ne yih chīzeṇ Rab ke lie maķhsūs kar dīn. Jahān bhī

wuh dūsrī qaumōn par ġħālib āyā wahān kī sonā-chāndī us ne Rab ke lie makhsūs kar dī. Yon Adom, Moāb, Ammon, Filistiyā aur Amāliq kī sonā-chāndī Rab ko pesh kī gaī.

¹² Abīshai bin Zarūyāh ne Namak kī Wādī meñ Adomiyōn par fatah pā kar 18,000 afrād halāk kar die. ¹³ Us ne Adom ke pūre mulk meñ apnī faujī chaukiyān qāym kīn, aur tamām Adomī Dāūd ke tābe ho gae. Dāūd jahān bhī jātā Rab us kī madad karke use fatah baķhshtā.

Dāūd ke Ālā Afsar

¹⁴ Jitnī der Dāūd pūre Isrāīl par hukumat kartā rahā utnī der tak us ne dhyān diyā ki qaum ke har ek shakhs ko insāf mil jāe. ¹⁵ Yoāb bin Zarūyāh fauj par muqarrar thā. Yahūsafat bin Akhīlūd bādshāh kā mushīr-e-khās thā. ¹⁶ Sadoq bin Akhītūb aur Abīmalik bin Abiyātar imām the. Shaushā mīrmunshī thā. ¹⁷ Bināyāh bin Yahoyadā Dāūd ke khās daste banām Karetī aur Faletī kā kaptān muqarrar thā. Dāūd ke betē ālā afsar the.

19

Ammonī Dāūd kī Be'izzatī Karte Haiñ

¹ Kuchh der ke bād Ammoniyōn kā bādshāh Nāhas faut huā, aur us kā betā taķhtnashīn huā. ² Dāūd ne sochā, “Nāhas ne hameshā mujh par mehrbānī kī thī, is lie ab maiñ bhī us ke betē Hanūn par mehrbānī karūnga.” Us ne bāp kī wafāt kā afsos karne ke lie Hanūn ke pās wafd bhejā.

Lekin jab Dāūd ke safīr Ammoniyoṇ ke darbār meṇ pahuṇch gae tāki Hanūn ke sāmne afsos kā izhār kareṇ³ to us mulk ke buzurg Hanūn Bādshāh ke kān meṇ manfī bāteṇ bharne lage, “Kyā Dāūd ne in ādmīyon ko wāqaī sirf is lie bhejā hai ki wuh afsos karke āp ke bāp kā ehtirām kareṇ? Hargiz nahīn! Yih sirf bahānā hai. Asal meṇ yih jāsūs hain jo hamāre mulk ke bāre meṇ mālūmāt hāsil karnā chāhte hain tāki us par qabzā kar sakeṇ.”⁴ Chunāñche Hanūn ne Dāūd ke ādmīyon ko pakarwā kar un kī dāṛhiyān mundwā dīn aur un ke libās ko kamr se le kar pānwoṇ tak kāṭ kar utarwāyā. Isī hālat meṇ bādshāh ne unheṇ fāriqī kar diyā.

⁵ Jab Dāūd ko is kī ƙhabar milī to us ne apne qāsidoṇ ko un se milne ke lie bhejā tāki unheṇ batāeṇ, “Yarīhū meṇ us waqt tak ṭhahre raheṇ jab tak āp kī dāṛhiyān dubārā bahāl na ho jāeṇ.” Kyoṇki wuh apnī dāṛhiyoṇ kī wajah se baṛī sharmindagī mahsūs kar rahe the.

Ammoniyoṇ se Jang

⁶ Ammoniyoṇ ko ƙhūb mālūm thā ki is harkat se ham Dāūd ke dushman ban gae hain. Is lie Hanūn aur Ammoniyoṇ ne Masoputāmiyā, Arām-mākā aur Zobāh ko chāndī ke 34,000 kilogrām bhej kar kirāe par rath aur rathsawār mangwāe.⁷ Yoṇ unheṇ 32,000 rath un ke sawāroṇ samet mil gae. Mākā kā bādshāh bhī apne dastoṇ ke sāth un se muttahid huā. Mīdabā ke qarīb unhoṇ ne apnī lashkargāh lagāī. Ammonī bhī apne shahroṇ se nikal kar jang ke lie jamā hue.⁸ Jab Dāūd ko is kā ilm

huā to us ne Yoāb ko pūrī fauj ke sāth un kā muqābalā karne ke lie bhej diyā. ⁹ Ammonī apne dārul-hukūmat Rabbā se nikal kar shahr ke darwāze ke sāmne hī saf-ārā hue jabki dūsre mamālik se āe hue bādshāh kuchh fāsile par khule maidān meñ khaṛe ho gae.

¹⁰ Jab Yoāb ne jān liyā ki sāmne aur pīchhe donoñ taraf se hamle kā ķhatrā hai to us ne apnī fauj ko do hissoñ meñ taqsīm kar diyā. Sab se achchhe faujiyoñ ke sāth wuh ķhud Shām ke sipāhiyoñ se larne ke lie taiyār huā. ¹¹ Bāqī ādmiyoñ ko us ne apne bhāī Abīshai ke hawāle kar diyā tāki wuh Ammoniyoñ se laṛen. ¹² Ek dūsre se alag hone se pahle Yoāb ne Abīshai se kahā, “Agar Shām ke faujī mujh par ġhālib āne lagen to mere pās ā kar merī madad karnā. Lekin agar āp Ammoniyoñ par qābū na pā sakeñ to maiñ ā kar āp kī madad karūṅga. ¹³ Hauslā rakheñ! Ham dilerī se apnī qaum aur apne Khudā ke shahroñ ke lie laṛen. Aur Rab wuh kuchh hone de jo us kī nazar meñ ṭhīk hai.”

¹⁴ Yoāb ne apnī fauj ke sāth Shām ke faujiyoñ par hamlā kiyā to wuh us ke sāmne se bhāgne lage. ¹⁵ Yih dekh kar Ammonī bhī us ke bhāī Abīshai se farār ho kar shahr meñ dākhil hue. Tab Yoāb Yarūshalam wāpas chalā gayā.

Shām ke ķhilāf Jang

¹⁶ Jab Shām ke faujiyoñ ko shikast kī be'izzatī kā ehsās huā to unhoñ ne Dariyā-e-Furāt ke pār Masoputāmiyā meñ ābād Arāmiyoñ ke pās qāsid bheje tāki wuh bhī larne meñ madad karen. Hadadazar kā kamāndar Sofak un par muqarrar

huā. ¹⁷ Jab Dāūd ko կhabar milī to us ne Isrāīl ke tamām larne ke qābil ādmiyon ko jamā kiyā aur Dariyā-e-Yardan ko pār karke un ke muqābil saf-ārā huā. Jab wuh yoñ un se larne ke lie taiyār huā to Arāmī us kā muqābalā karne lage. ¹⁸ Lekin unheñ dubārā shikast mān kar farār honā parā. Is dafā un ke 7,000 rathbānoñ ke alāwā 40,000 piyādā sipāhī halāk hue. Dāūd ne fauj ke kamāndar Sofak ko bhī mār ڏalā.

¹⁹ Jo Arāmī pahle Hadadazar ke tābe the unhoñ ne ab hār mān kar Isrāiliyoñ se sulah kar lī aur un ke tābe ho gae. Us waqt se Arāmiyoñ ne Ammoniyoñ kī madad karne kī phir jurrat na kī.

20

Rabbā Shahr par Fatah

¹ Bahār kā mausam ā gayā, wuh waqt jab bādshāh jang ke lie nikalte haiñ. Tab Yoāb ne fauj le kar Ammoniyoñ kā mulk tabāh kar diyā. Lar̄te lar̄te wuh Rabbā tak pahuñch gayā aur us kā muhāsarā karne lagā. Lekin Dāūd khud Yarūshalam meñ rahā. Phir Yoāb ne Rabbā ko bhī shikast de kar կhāk meñ milā diyā. ² Dāūd ne Hanūn Bādshāh kā tāj us ke sar se utār kar apne sar par rakh liyā. Sone ke is tāj kā wazn 34 kilogrām thā, aur us meñ ek beshqīmat jauhar jaṛā huā thā. Dāūd ne shahr se bahut-sā lūṭā huā māl le kar ³ us ke bāshindon ko گhulām banā liyā. Unheñ patthar kāṭne kī āriyān, lohe kī kudālen aur kulhāriyān dī gaīn taki wuh mazdūrī karen. Yihī sulūk bāqī Ammonī shahroñ ke bāshindon ke sāth bhī kiyā

gayā. Jang ke ikhtitām par Dāūd pūrī fauj ke sāth Yarūshalam lauṭ āyā.

Filistiyon se Jang

⁴ Is ke bād Isrāiliyon ko Jazar ke qarīb Filistiyon se laṛnā paṛā. Wahān Sibbakī Hūsātī ne dewqāmat mard Rafā kī aulād meñ se ek ādmī ko mār ḥālā jis kā nām Saffī thā. Yoñ Filistiyon ko tābe kar liyā gayā. ⁵ Un se ek aur laṛāī ke daurān Ilhanān bin Yāir ne Jātī Jālūt ke bhāī Lahmī ko maut ke ghāṭ utār diyā. Us kā nezā khaḍḍī ke shahtir jaisā baṛā thā. ⁶ Ek aur dafā Jāt ke pās laṛāī huī. Filistiyon kā ek faujī jo Rafā kī nasl kā thā bahut lambā thā. Us ke hāthoñ aur pairoñ kī chhih chhih ungliyān yānī mil kar 24 ungliyān thiñ. ⁷ Jab wuh Isrāiliyon kā mazāq uṛāne lagā to Dāūd ke bhāī Simā ke beṭe Yūnatan ne use mār ḥālā. ⁸ Jāt ke yih dewqāmat mard Rafā kī aulād the, aur wuh Dāūd aur us ke faujiyon ke hāthoñ halāk hue.

21

Dāūd kī Mardumshumārī

¹ Ek din Iblīs Isrāīl ke khilāf uṭh khaṛā huā aur Dāūd ko Isrāīl kī mardumshumārī karne par uksāyā. ² Dāūd ne Yoāb aur qaum ke buzurgoñ ko hukm diyā, “Dān se le kar Bair-sabā tak Isrāīl ke tamām qabiloñ meñ se guzarte hue jang karne ke qābil mardoñ ko gin leñ. Phir wāpas ā kar mujhe ittalā deñ tāki mālūm ho jāe ki un kī kul tādād kyā hai.”

³ Lekin Yoāb ne etarāz kiyā, “Ai bādshāh mere āqā, kāsh Rab apne faujiyon kī tādād sau gunā

baṛhā de. Kyoṇki yih to sab āp ke khādim haiñ. Lekin mere āqā un kī mardumshumārī kyoṇ karnā chāhte hain? Isrāīl āp ke sabab se kyoṇ quṣūrwār ṭhahre?”

⁴ Lekin bādshāh Yoāb ke etarāzāt ke bāwujūd apnī bāt par ḏaṭā rahā. Chunānche Yoāb darbār se rawānā huā aur pūre Isrāīl meñ se guzar kar us kī mardumshumārī kī. Is ke bād wuh Yarūshalam wāpas ā gayā. ⁵ Wahān us ne Dāūd ko mardumshumārī kī pūrī riport pesh kī. Isrāīl meñ 11,00,000 talwār chalāne ke qābil afrād the jabki Yahūdāh ke 4,70,000 mard the. ⁶ Hālānki Yoāb ne Lāwī aur Binyamīn ke qabīloñ ko mardumshumārī meñ shāmil nahīn kiyā thā, kyoṇki use yih kām karne se għin ātī thī.

⁷ Allāh ko Dāūd kī yih harkat burī lagī, is lie us ne Isrāīl ko sazā dī. ⁸ Tab Dāūd ne Allāh se duā kī, “Mujh se sangīn gunāh sarzad huā hai. Ab apne khādim kā quṣūr muāf kar. Mujh se barī hamāqat huī hai.” ⁹ Tab Rab Dāūd ke ḡhaibbin Jād Nabī se hamkalām huā, ¹⁰ “Dāūd ke pās jā kar use batā denā, ‘Rab tujhe tīn sazāeñ pesh kartā hai. In meñ se ek chun le.’”

¹¹ Jād Dāūd ke pās gayā aur use Rab kā paighām sunā diyā. Us ne sawāl kiyā, “Āp kis sazā ko tarjīh dete hain? ¹² Sāt sāl ke daurān kāl? Yā yih ki āp ke dushman tīn māh tak āp ko talwār se mār mār kar āp kā tāqqub karte raheñ? Yā yih ki Rab kī talwār Isrāīl meñ se guzare? Is sūrat meñ Rab kā farishtā mulk meñ wabā phailā kar pūre Isrāīl kā satyānās kar degā.”

¹³ Dāūd ne jawāb diyā, “Hāy maiñ kyā kahūn? Maiñ bahut pareshān hūn. Lekin ādmīyon ke

hāthon men paṛ jāne kī nisbat behtar hai ki ham Rab hī ke hāthon men paṛ jāen, kyonki us kā rahm nihāyat azīm hai.”

¹⁴ Tab Rab ne Isrāīl men wabā phailne dī. Mulk men 70,000 afrād halāk hue. ¹⁵ Allāh ne apne farishte ko Yarūshalam ko tabāh karne ke lie bhī bhejā. Lekin farishtā abhī is ke lie taiyār ho rahā thā ki Rab ne logoṇ kī musībat ko dekh kar tars khāyā aur tabāh karne wāle farishte ko hukm diyā, “Bas kar! Ab bāz ā.” Us waqt Rab kā farishtā wahān khaṛā thā jahān urnān yānī Araunāh Yabūsī apnā anāj gāhtā thā. ¹⁶ Dāūd ne apnī nigāh uṭhā kar Rab ke farishte ko āsmān-o-zamīn ke darmiyān khaṛē dekhā. Apnī talwār miyān se khīñch kar us ne use Yarūshalam kī taraf barhāyā thā ki Dāūd buzurgoṇ samet muñh ke bal gir gayā. Sab tāt kā libās oṛhe hue the. ¹⁷ Dāūd ne Allāh se iltamās kī, “Main hī ne hukm diyā ki laṛne ke qābil mardon ko ginā jāe. Main hī ne gunāh kiyā hai, yih merā hī quṣūr hai. In bheṛoṇ se kyā ghaltī huī hai? Ai Rab mere Khudā, barāh-e-karm in ko chhoṛ kar mujhe aur mere khāndān ko sazā de. Apnī qaum se wabā dūr kar!”

¹⁸ Phir Rab ke farishte ne Jād kī mārifat Dāūd ko paighām bhejā, “Araunāh Yabūsī kī gāhne kī jagah ke pās jā kar us par Rab kī qurbāngāh banā le.”

¹⁹ Chunāñche Dāūd chāṛh kar gāhne kī jagah ke pās āyā jis tarah Rab ne Jād kī mārifat farmāyā thā. ²⁰ Us waqt Araunāh apne chāṛ betoṇ ke sāth gandum gāh rahā thā. Jab us ne pīchhe dekhā to farishtā nazar āyā. Araunāh

ke beṭe bhāg kar chhup gae. ²¹ Itne meṇ Dāūd ā pahuñchā. Use dekhte hī Araunāh gāhne kī jagah ko chhoṛ kar us se milne gayā aur us ke sāmne aundhe muñh jhuk gayā. ²² Dāūd ne us se kahā, “Mujhe apnī gāhne kī jagah de deñ tāki maiñ yahāñ Rab ke lie qurbāngāh tāmīr karūñ. Kyoñki yih karne se wabā ruk jāegī. Mujhe is kī pūrī qīmat batāeñ.”

²³ Araunāh ne Dāūd se kahā, “Mere āqā aur bādshāh, ise le kar wuh kuchh kareñ jo āp ko achchhā lage. Dekheñ, maiñ āp ko apne bailoñ ko bhasm hone wālī qurbāniyon ke lie de detā hūñ. Anāj ko gāhne kā sāmān qurbāngāh par rakh kar jalā deñ. Merā anāj ghallā kī nazar ke lie hāzir hai. Main ɭhushī se āp ko yih sab kuchh de detā hūñ.” ²⁴ Lekin Dāūd Bādshāh ne inkār kiyā, “Nahīñ, maiñ zarūr har chīz kī pūrī qīmat adā karūñga. Jo āp kī hai use maiñ le kar Rab ko pesh nahīñ karūñga, na maiñ aisī koī bhasm hone wālī qurbānī chaṛhāūñgā jo mujhe muft meñ mil jāe.”

²⁵ Chunāñche Dāūd ne Araunāh ko us jagah ke lie sone ke 600 sikke de die. ²⁶ Us ne wahāñ Rab kī tāzīm meñ qurbāngāh tāmīr karke us par bhasm hone wālī aur salāmatī kī qurbāniyān chaṛhāīñ. Jab us ne Rab se iltamās kī to Rab ne us kī sunī aur jawāb meñ āsmān se bhasm hone wālī qurbānī par āg bhej dī. ²⁷ Phir Rab ne maut ke farishte ko hukm diyā, aur us ne apnī talwār ko dubārā miyān meñ dāl diyā.

²⁸ Yoñ Dāūd ne jān liyā ki Rab ne Araunāh Yabūsī kī gahne kī jagah par merī sunī jab maiñ ne yahāñ qurbāniyān chaṛhāīñ. ²⁹ Us waqt Rab

kā wuh muqaddas Ḳhaimā jo Mūsā ne registān meñ banwāyā thā Jibaūn kī pahāṛī par thā. Qurbāniyon̄ ko jalāne kī qurbāngāh bhī wahīn thi. ³⁰ Lekin ab Dāūd meñ wahān jā kar Rab ke huzūr us kī marzī dariyāft karne kī jurrat na rahī, kyoñki Rab ke farishte kī talwār ko dekh kar us par itnī shadīd dahshat tārī huī ki wuh jā hī nahīn saktā thā.

22

¹ Is lie Dāūd ne faisलā kiyā, “Rab hamāre Khudā kā ghar gāhne kī is jagah par hogā, aur yahān wuh qurbāngāh bhī hogī jis par Isrāīl ke lie bhasm hone wālī qurbānī jalāī jātī hai.”

Dāūd Rab kā Ghar Banāne kī Taiyāriyān Kartā Hai

² Chunāñche us ne Isrāīl meñ rahne wāle pardesiyoñ ko bulā kar unheñ Allāh ke ghar ke lie darkār tarāshe hue patthar taiyār karne kī zimmedārī dī. ³ Is ke alāwā Dāūd ne darwāzoñ ke kiwāroñ kī kiloñ aur karon ke lie lohe ke bareñ dher lagāe. Sāth sāth itnā pītal ikaṭhā kiyā gayā ki ākhirkār use tolā na jā sakā. ⁴ Isī tarah deodār kī bahut zyādā lakaṛī Yarūshalam lāī gaī. Saidā aur Sūr ke bāshindoñ ne use Dāūd tak pahuñchāyā. ⁵ Yih sāmān jamā karne ke pīchhe Dāūd kā yih Ḳhayāl thā, “Merā betā Sūlemān jawān hai, aur us kā abhī itnā tajrabā nahīn hai, hālāñki jo ghar Rab ke lie banwānā hai use itnā barā aur shāndār hone kī zarūrat hai ki tamām duniyā hakkā-bakkā rah kar us kī tārif kare. Is lie maiñ khud jahān tak ho sake use banwāne kī

taiyāriyān karūnīga.” Yihī wajah thī ki Dāūd ne apnī maut se pahle itnā sāmān jamā karāyā.

Dāūd Sulemān ko Rab kā Ghar Banwāne kī Zimmedārī Detā Hai

⁶ Phir Dāūd ne apne bete Sulemān ko bulā kar use Rab Isrāīl ke Khudā ke lie sukūnatgāh banwāne kī zimmedārī de kar ⁷ kahā, “Mere bete, maiñ khud Rab apne Khudā ke nām ke lie ghar banānā chāhtā thā. ⁸ Lekin mujhe ijāzat nahīn milī, kyoñki Rab mujh se hamkalām huā, ‘Tū ne shadīd qism kī jangeñ laṛ kar beshumār logoñ ko mār diyā hai. Nahīn, tū mere nām ke lie ghar tāmīr nahīn karegā, kyoñki mere dekhete dekhete tū bahut khūñrezī kā sabab banā hai. ⁹ Lekin tere ek betā paidā hogā jo amnpasand hogā. Use maiñ amn-o-amān muhaiyā karūnīga, use chāronī taraf ke dushmanoñ se laṛnā nahīn parēgā. Us kā nām Sulemān hogā, aur us kī hukūmat ke daurān maiñ Isrāīl ko amn-o-amān atā karūnīga. ¹⁰ Wuhī mere nām ke lie ghar banāegā. Wuh merā betā hogā aur maiñ us kā bāp hūñgā. Aur maiñ Isrāīl par us kī bādshāhī kā takht hameshā tak qāym rakhūnīga.”

¹¹ Dāūd ne bāt jārī rakh kar kahā, “Mere bete, Rab āp ke sāth ho tāki āp ko kāmyābī hāsil ho aur āp Rab apne Khudā kā ghar us ke wāde ke mutābiq tāmīr kar sakeñ. ¹² Āp ko Isrāīl par muqarrar karte waqt Rab āp ko hikmat aur samajh atā kare tāki āp Rab apne Khudā kī sharīat par amal kar sakeñ. ¹³ Agar āp ehtiyāt se un hidāyāt aur ahkām par amal kareñ jo Rab ne Mūsā kī mārifat Isrāīl ko de die to āp ko zarūr kāmyābī hāsil hogī. Mazbūt aur diler hoñ.

Dareñ mat aur himmat na hāreñ. ¹⁴ Dekhen, maiñ ne baṛī jidd-o-jahd ke sāth Rab ke ghar ke lie sone ke 34,00,000 kilogrām aur chāndī ke 3,40,00,000 kilogrām taiyār kar rakhe haiñ. Is ke alāwā maiñ ne itnā pītal aur lohā ikaṭṭhā kiyā ki use tolā nahīñ jā saktā, nīz lakaṛī aur patthar kā dher lagāyā, agarche āp aur bhī jamā karenge. ¹⁵ Āp kī madad karne wāle kārīgar bahut haiñ. Un meñ patthar ko tarāshne wāle, rāj, barhaī aur aise kārīgar shāmil haiñ jo mahārat se har qism kī chīz banā sakte haiñ, ¹⁶ khāh wuh sone, chāndī, pītal yā lohe kī kyon na ho. Beshumār aise log taiyār khaṛe haiñ. Ab kām shurū karen, aur Rab āp ke sāth ho!”

¹⁷ Phir Dāūd ne Isrāīl ke tamām rāhnumāoñ ko apne bete Sulemān kī madad karne kā hukm diyā. ¹⁸ Us ne un se kahā, “Rab āp kā Khudā āp ke sāth hai. Us ne āp ko paṛosī qaumōñ se mahfūz rakh kar amn-o-amān atā kiyā hai. Mulk ke bāshindoñ ko us ne mere hawāle kar diyā, aur ab yih mulk Rab aur us kī qaum ke tābe ho gayā hai. ¹⁹ Ab dil-o-jān se Rab apne Khudā ke tālib raheñ. Rab apne Khudā ke maqdis kī tāmīr shurū karen tāki āp jaldī se ahd kā sandūq aur muqaddas khaime ke sāmān ko us ghar meñ lā sakeñ jo Rab ke nām kī tāzīm meñ tāmīr hogā.”

23

¹ Jab Dāūd umrrasīdā thā to us ne apne bete Sulemān ko Isrāīl kā bādshāh banā diyā.

Khidmat ke lie Lāwiyoñ ke Guroh

² Dāūd ne Isrāīl ke tamām rāhnumāoñ ko imāmoñ aur Lāwiyoñ samet apne pās bulā liyā.

³ Tamām un Lāwiyoṇ ko ginā gayā jin kī umr tīs sāl yā is se zāyd thī. Un kī kul tādād 38,000 thī. ⁴ Inheṇ Dāūd ne mukhtalif zimmedāriyān sauṇpīn. 24,000 afrād Rab ke ghar kī tāmīr ke nigarān, 6,000 afsar aur qāzī, ⁵ 4,000 darbān aur 4,000 aise mausīqār ban gae jinheṇ Dāūd ke banwāe hue sāzoṇ ko bajā kar Rab kī hamd-o-sanā karnī thī.

⁶ Dāūd ne Lāwiyoṇ ko Lāwī ke tīn betoṇ Jairson, Qihāt aur Mirārī ke mutābiq tīn gurohoṇ meṇ taqsīm kiyā.

⁷ Jairson ke do bete Lādān aur Simāī the.

⁸ Lādān ke tīn bete Yihiyel, Zaitām aur Yoel the.

⁹ Simāī ke tīn bete Salūmīt, Haziyal aur Hārān the. Yih Lādān ke gharānoṇ ke sarbarāh the.

¹⁰⁻¹¹ Simāī ke chār bete bare se le kar chhoṭe tak Yahat, Zīzā, Yaūs aur Bariyā the. Chūnki Yaūs aur Bariyā ke kam bete the is lie un kī aulād mil kar khidmat ke lihāz se ek hī khāndān aur guroh kī haisiyat rakhtī thī.

¹² Qihāt ke chār bete Amrām, Izhār, Habrūn aur Uzziyel the. ¹³ Amrām ke do bete Hārūn aur Mūsā the. Hārūn aur us kī aulād ko alag kiyā gayā tāki wuh hameshā tak muqaddastarīn chīzoṇ ko makhsūs-o-muqaddas rakheṇ, Rab ke huzūr qurbāniyān pesh kareṇ, us kī khidmat kareṇ aur us ke nām se logoṇ ko barkat deṇ.

¹⁴ Mard-e-Khudā Mūsā ke betoṇ ko bāqī Lāwiyoṇ meṇ shumār kiyā jātā thā. ¹⁵ Mūsā ke do bete Jairsom aur Iliyazar the. ¹⁶ Jairsom ke pahlauṭhe kā nām Sabuel thā. ¹⁷ Iliyazar kā sirf ek betā Rahabiyāh thā. Lekin Rahabiyāh kī beshumār aulād thī. ¹⁸ Izhār ke pahlauṭhe kā nām Salūmīt

thā. ¹⁹ Habrūn ke chār beṭe bare se le kar chhoṭe tak Yariyāh, Amariyāh, Yahziyel aur Yaqamiyām the. ²⁰ Uzziyel kā pahlauṭhā Mīkāh thā. Dūsre kā nām Yissiyāh thā.

²¹ Mirārī ke do beṭe Mahlī aur Mūshī the. Mahlī ke do beṭe Iliyazar aur Qīs the. ²² Jab Iliyazar faut huā to us kī sirf betiyān thīn. In betiyon kī shādī Qīs ke beṭon yānī chachāzād bhāiyoṇ se huī. ²³ Mūshī ke tīn beṭe Mahlī, Idar aur Yarīmot the.

²⁴ Ĝharz yih Lāwī ke qabīle ke ƙhāndān aur sarparast the. Har ek ko ƙhāndānī rajistar meñ darj kiyā gayā thā. In meñ se jo Rab ke ghar meñ khidmat karte the har ek kī umr kam az kam 20 sāl thi.

²⁵⁻²⁷ Kyoñki Dāūd ne marne se pahle pahle hukm diyā thā ki jitne Lāwiyoṇ kī umr kam az kam 20 sāl hai, wuh ƙhidmat ke lie rajistar meñ darj kie jāeñ. Is nātē se us ne kahā thā,

“Rab Isrāīl ke Khudā ne apnī qaum ko amn-o-amān atā kiyā hai, aur ab wuh hameshā ke lie Yarūshalam meñ sukūnat karegā. Ab se Lāwiyoṇ ko mulāqāt kā ƙhaimā aur us kā sāmān uṭhā kar jagah bajagah le jāne kī zarūrat nahīn rahi. ²⁸ Ab se wuh imāmoṇ kī mādad karen jab yih Rab ke ghar meñ ƙhidmat karte hain. Wuh sahnoṇ aur chhoṭe kamroṇ ko sañbhālen aur dhyān deñ ki Rab ke ghar ke lie maṄhsūs-o-muqaddas kī gaī chīzeñ pāksāf raheñ. Unheñ Allāh ke ghar meñ kaī aur zimmedāriyān bhī sauṇpī jāeñ. ²⁹ Zail kī chīzeñ sañbhālnā sirf unhīn kī zimmedārī hai: maṄhsūs-o-muqaddas kī gaī roṭiyān, ḡhallā

kī nazaron ke lie mustāmal maidā, bekhamīrī rotiyān pakāne aur gūndhne kā intazām. Lāzim hai ki wuhī tamām lawāzimāt ko achchhī tarah tolen aur nāpeñ. ³⁰ Har subah aur shām ko un ke gulukār Rab kī hamd-o-sanā kareñ. ³¹ Jab bhi Rab ko bhasm hone wālī qurbāniyān pesh kī jāeñ to Lāwī madad kareñ, khāh Sabat ko, khāh Nae Chānd kī Īd yā kisī aur īd ke mauqe par ho. Lāzim hai ki wuh rozānā muqarrarā tādād ke mutābiq khidmat ke lie hāzir ho jāeñ.”

³² Is tarah Lāwī pahle mulāqāt ke khaime mein aur bād meñ Rab ke ghar meñ apni khidmat saranjām dete rahe. Wuh Rab ke ghar kī khidmat meñ apne qabāylī bhāiyoñ yānī imāmoñ kī madad karte the.

24

Khidmat ke lie Imāmoñ ke Guroh

¹ Hārūn kī aulād ko bhī mukhtalif gurohoñ mein taqsīm kiyā gayā. Hārūn ke chār bete Nadab, Abīhū, Iliyazar aur Itamar the. ² Nadab aur Abīhū apne bāp se pahle mar gae. Aur un ke bete nahīn the. Iliyazar aur Itamar imām ban gae. ³ Dāūd ne imāmoñ ko khidmat ke mukhtalif gurohoñ mein taqsīm kiyā. Sadoq aur Akhīmalik ne is mein Dāūd kī madad kī. (Sadoq Iliyazar kī aulād mein se aur Akhīmalik Itamar kī aulād mein se thā.) ⁴ Iliyazar kī aulād ko 16 gurohoñ mein aur Itamar kī aulād ko 8 gurohoñ mein taqsīm kiyā gayā, kyonki Iliyazar kī aulād ke itne hī zyādā khāndānī sarparast the. ⁵ Tamām zimmedāriyān qurā dāl kar in mukhtalif gurohoñ mein taqsīm kī gaīn, kyonki

Iliyazar aur Itamar donoṇ ḥāndānoṇ ke bahut sāre aise afsar the jo pahle se maqdis meṇ Rab kī khidmat karte the.

⁶ Yih zimmedāriyān taqsīm karne ke lie Iliyazar aur Itamar kī aulād bārī bārī qurā dālte rahe. Qurā dālte waqt bādshāh, Isrāīl ke buzurg, Sadoq Imām, Aḥmalik bin Abiyātar aur imāmoṇ aur Lāwiyon ke ḥāndānī sarparast hāzir the. Mīrmunshī Samāyāh bin Nataniyel ne jo ḫhud Lāwī thā khidmat ke in gurohoṇ kī fahrist zail kī tartīb se likh lī jis tarah wuh qurā dālne se muqarrar kie gae.

- ⁷ 1. Yahūyarīb,
2. Yadāyāh,
- ⁸ 3. Hārim,
4. Saūrīm,
- ⁹ 5. Malkiyāh,
6. Miyāmīn,
- ¹⁰ 7. Haqqūz,
8. Abiyāh,
- ¹¹ 9. Yashua,
10. Sakaniyāh,
- ¹² 11. Iliyāsib,
12. Yaqīm,
- ¹³ 13. Khuffāh,
14. Yasbiyāb,
- ¹⁴ 15. Biljā,
16. Immer,
- ¹⁵ 17. Khazīr,
18. Fizzīz,
- ¹⁶ 19. Fatahiyāh,
20. Yahizqel,
- ¹⁷ 21. Yakīn,

22. Jamūl,
 18 23. Dilāyāh,
 24. Māziyāh.

¹⁹ Imāmoṇ ko isī tartīb ke mutābiq Rab ke ghar meṇ ā kar apnī khidmat saranjām denī thī, un hidāyāt ke mutābiq jo Rab Isrāīl ke Khudā ne unheṇ un ke bāp Hārūn kī mārifat dī thīn.

Khidmat ke lie Lāwiyon ke Mazīd Guroh

²⁰ Zail ke Lāwiyon ke mazīd khāndānī sarparast hain:

Amrām kī aulād meṇ se Sūbāel,
 Sūbāel kī aulād meṇ se Yahadiyāh

²¹ Rahabiyāh kī aulād meṇ se Yissiyāh sarparast thā,

²² Izhār kī aulād meṇ se Salūmīt,
 Salūmīt kī aulād meṇ se Yahat,

²³ Habrūn kī aulād meṇ se bare se le kar chhoṭe tak Yariyāh, Amariyāh, Yāzhiyel aur Yaqamiyām,

²⁴ Uzziyel kī aulād meṇ se Mīkāh,
 Mīkāh kī aulād meṇ se Samīr,

²⁵ Mīkāh kā bhāī Yissiyāh,
 Yissiyāh kī aulād meṇ se Zakariyāh,

²⁶ Mirārī kī aulād meṇ se Mahlī aur Mūshī, us ke bete Yāziyāh kī aulād,

²⁷ Mirārī ke bete Yāziyāh kī aulād meṇ se Sūham, Zakkūr aur Ibrī,

²⁸⁻²⁹ Mahlī kī aulād meṇ se Iliyazar aur Qīs. Iliyazar beaulād thā jabki Qīs ke hān Yarahmiyel paidā huā.

³⁰ Mūshī kī aulād meṇ se Mahlī, Idar aur Yarīmot bhī Lāwiyon ke in mazīd khāndānī sarparastoṇ meṇ shāmil the.

31 Imāmoṇ kī tarah un kī zimmedāriyāṇ bhī qurā-andāzī se muqarrar kī gaīn. Is silsile meṇ sab se chhoṭe bhāī ke khāndān ke sāth aur sab se baṛe bhāī ke khāndān ke sāth sulūk barābar thā. Is kār-rāwāī ke lie bhī Dāūd Bādshāh, Sadoq, Akhīmalik aur imāmoṇ aur Lāwiyoṇ ke khāndānī sarparast hāzir the.

25

Rab ke Ghar meṇ Mausīqāroṇ ke Guroh

1 Dāūd ne fauj ke ālā afsaroṇ ke sāth Āsaf, Haimān aur Yadūtūn kī aulād ko ek khās khidmat ke lie alag kar diyā. Unheṇ nabuwwat kī rūh meṇ sarod, sitār aur jhānjh bajānā thā. Zail ke ādmiyoṇ ko muqarrar kiyā gayā:

2 Āsaf ke khāndān se Āsaf ke betē Zakkūr, Yūsuf, Nataniyāh aur Asarelāh. Un kā bāp guroh kā rāhnumā thā, aur wuh bādshāh kī hidāyat ke mutābiq nabuwwat kī rūh meṇ sāz bajātā thā.

3 Yadūtūn ke khāndān se Yadūtūn ke betē Jidaliyāh, Zarī, Yasāyāh, Simāī, Hasbiyāh, aur Mattitiyāh. Un kā bāp guroh kā rāhnumā thā, aur wuh nabuwwat kī rūh meṇ Rab kī hamd-o-sanā karte hue sitār bajātā thā.

4 Haimān ke khāndān se Haimān ke betē Buqqiyāh, Mattaniyāh, Uzziyel, Sabuel, Yarīmot, Hananiyāh, Hanānī, Iliyātā, Jiddāltī, Rūmamtī-azar, Yasbiqāshā, Mallūtī, Hautīr aur Mahāziyot. **5** In sab kā bāp Haimān Dāūd Bādshāh kā ḡhaibbīn thā. Allāh ne Haimān se wādā kiyā thā ki maiṇ terī tāqat barhā dūṅgā, is lie us ne use 14 betē aur tīn betiyāṇ atā kī thiṇ.

⁶ Yih sab apne apne bāp yānī Āsaf, Yadūtūn aur Haimān kī rāhnumāī men sāz bajāte the. Jab kabhī Rab ke ghar meñ git gāe jāte the to yih mausīqār sāth sāth jhānjh, sitār aur sarod bajāte the. Wuh apnī khidmat bādshāh kī hidāyāt ke mutābiq saranjām dete the. ⁷ Apne bhāiyoñ samet jo Rab kī tāzīm meñ git gāte the un kī kul tādād 288 thī. Sab ke sab māhir the. ⁸ Un kī mukhtalif zimmedāriyān bhī qurā ke zariye muqarrar kī gaïn. Is meñ sab ke sāth sulūk ek jaisā thā, khāh jawān the yā bürhe, khāh ustād the yā shāgird.

⁹ Qurā dāl kar 24 gurohoñ ko muqarrar kiyā gayā. Har guroh ke bārah bārah ādmī the. Yoñ zail ke ādmiyon ke gurohoñ ne tashkīl pāi:

1. Āsaf ke khāndān kā Yūsuf,
2. Jidaliyāh,
- ¹⁰ 3. Zakkūr,
- ¹¹ 4. Zarī,
- ¹² 5. Nataniyāh,
- ¹³ 6. Buqqiyāh,
- ¹⁴ 7. Yasarelāh,
- ¹⁵ 8. Yasāyāh,
- ¹⁶ 9. Mattaniyāh,
- ¹⁷ 10. Simāī,
- ¹⁸ 11. Azarel,
- ¹⁹ 12. Hasbiyāh,
- ²⁰ 13. Sūbāel,
- ²¹ 14. Mattitiyāh,
- ²² 15. Yarīmot,
- ²³ 16. Hananiyāh,
- ²⁴ 17. Yasbiqāshā,
- ²⁵ 18. Hanānī,

²⁶ 19. Mallūtī,

²⁷ 20. Iliyātā,

²⁸ 21. Hautīr,

²⁹ 22. Jiddāltī,

³⁰ 23. Mahāziyot,

³¹ 24. Rūmamti-azar.

Har guroh men rāhnumā ke bete aur kuchh rishtedār shāmil the.

26

Rab ke Ghar ke Darbān

¹ Rab ke ghar ke sahan ke darwāzoṇ par pahrādārī karne ke guroh bhī muqarrar kie gae. Un men zail ke ādmī shāmil the:

Qorah ke khāndān kā fard Masalamiyāh bin Qore jo Āsaf kī aulād men se thā. ² Masalamiyāh ke sāt bete bare se le kar chhoṭe tak Zakariyāh, Yadiyael, Zabadiyāh, Yatniyel, ³ Ailām, Yūhanān aur Ilīhuainī the.

⁴⁻⁵ Obed-adom bhī darbān thā. Allāh ne use barkat de kar āṭh bete die the. Bare se le kar chhoṭe tak un ke nām Samāyāh, Yahūzabad, Yuākh, Sakār, Nataniyel, Ammiyel, Ishkār aur Fa'ūllatī the. ⁶ Samāyāh bin Obed-adom ke bete khāndānī sarbarāh the, kyoṇki wuh kāfī asar-o-rasūkh rakhte the. ⁷ Un ke nām utnī, rafael, Obed aur Ilzabad the. Samāyāh ke rishtedār Ilīhū aur Samakiyāh bhī guroh men shāmil the, kyoṇki wuh bhī khās haisiyat rakhte the. ⁸ Obed-adom se nikle yih tamām ādmī lāyq the. Wuh apne betoṇ aur rishtedāroṇ samet kul 62 afrād the aur sab mahārat se apnī khidmat saranjām dete the.

9 Masalamiyāh ke bete aur rishtedār kul 18 ādmī the. Sab lāyq the.

10 Mirārī ke khāndān kā fard Hūsā ke chār bete Simrī, Khilqiyāh, Tabaliyāh aur Zakariyāh the. Hūsā ne Simrī ko khidmat ke guroh kā sarbarāh banā diyā thā agarche wuh pahlauṭhā nahīn thā. **11** Dūsre bete bare se le kar chhoṭe tak Khilqiyāh, Tabaliyāh aur Zakariyāh the. Hūsā ke kul 13 bete aur rishtedār the.

12 Darbānoṇ ke in gurohoṇ meñ khāndānī sarparast aur tamām ādmī shāmil the. Bāqī Lāwiyon kī tarah yih bhī Rab ke ghar meñ apnī khidmat saranjām dete the. **13** Qurā-andāzī se muqarrar kiyā gayā ki kaun-sā guroh sahan ke kis darwāze kī pahrādārī kare. Is silsile meñ bare aur chhoṭe khāndānoṇ meñ imtiyāz na kiyā gayā. **14** Yoṇ jab qurā dālā gayā to Masalamiyāh ke khāndān kā nām Mashriqī Darwāze kī pahrādārī karne ke lie niklā. Zakariyāh bin Masalamiyāh ke khāndān kā nām Shimālī Darwāze kī pahrādārī karne ke lie niklā. Zakariyāh apne dānā mashwaroṇ ke lie mashhūr thā. **15** Jab qurā Junūbī Darwāze kī pahrādārī ke lie dālā gayā to Obed-adom kā nām niklā. Us ke betoṇ ko godām kī pahrādārī karne kī zimmedārī dī gaī. **16** Jab Mağribī Darwāze aur Salakat Darwāze ke lie qurā dālā gayā to Suffīm aur Hūsā ke nām nikle. Salakat Darwāzā chaṛhnī wāle rāste par hai.

Pahrādārī kī khidmat yoṇ bāñtī gaī:

17 Rozānā Mashriqī Darwāze par chhih Lāwī pahrā dete the, Shimālī aur Junūbī Darwāzoṇ par chār chār afrād aur godām par do. **18** Rab

ke ghar ke sahan ke Maḡribī Darwāze par chhih Lāwī pahrā dete the, chār rāste par aur do sahan meñ.

¹⁹ Yih sab darbānoñ ke guroh the. Sab Qorah aur Mirārī ke khāndānoñ kī aulād the.

Khidmat ke lie Lāwiyon ke Mazīd Guroh

²⁰ Dūsre kuchh Lāwī Allāh ke ghar ke khazānoñ aur Rab ke lie makhsūs kī gaī chīzeñ sañbhālte the.

²¹⁻²² Do bhāī Zaitām aur Yoel Rab ke ghar ke khazānoñ kī pahrādārī karte the. Wuh Yihiyel ke khāndān ke sarparast the aur yoñ Lādān Jairsonī kī aulād the. ²³ Amrām, Izhār, Habrūn aur Uzziyel ke khāndānoñ kī yih zimmedāriyāñ thīñ:

²⁴ Sabuel bin Jairsom bin Mūsā khazānoñ kā nigarān thā. ²⁵ Jairsom ke bhāī Iliyazar kā betā Rahabiyāh thā. Rahabiyāh kā betā Yasāyāh, Yasāyāh kā betā Yūrām, Yūrām kā betā Zikrī aur Zikrī kā betā Salūmīt thā. ²⁶ Salūmīt apne bhāiyoñ ke sāth un muqaddas chīzoñ ko sañbhāltā thā jo Dāūd Bādshāh, khāndānī sarparastoñ, hazār hazār aur sau sau faujiyoñ par muqarrar afsaroñ aur dūsre ālā afsaroñ ne Rab ke lie makhsūs kī thiñ. ²⁷ Yih chīzeñ jangoñ meñ lüte hue māl meñ se le kar Rab ke ghar ko mazbūt karne ke lie makhsūs kī gaī thiñ. ²⁸ In meñ wuh sāmān bhī shāmil thā jo Samuel Ḍhaibbīn, Sāūl bin Qīs, Abinair bin Nair aur Yoāb bin Zarūyāh ne maqdis ke lie makhsūs kiyā thā. Salūmīt aur us ke bhāī in tamām chīzoñ ko sañbhālte the.

²⁹ Izhār ke қhāndān ke afrād yānī kananiyāh aur us ke bētoñ ko Rab ke ghar se bāhar kī zimmedāriyān dī gaīn. Unheñ nigarānon aur qāziyoñ kī haisiyat se Isrāīl par muqarrar kiyā gayā. ³⁰ Habrūn ke қhāndān ke afrād yānī Hasbiyāh aur us ke bhāiyoñ ko Dariyā-e-Yardan ke mağhrib ke ilāqe ko sañbhālne kī zimmedārī dī gaī. Wahān wuh Rab ke ghar se mutalliq kāmoñ ke alāwā bādshāh kī khidmat bhī saranjām dete the. In lāyq ādmīyoñ kī kul tādād 1,700 thī.

³¹ Dāūd Bādshāh kī hukūmat ke 40weñ sāl meñ nasabnāme kī tahqīq kī gai tāki Habrūn ke қhāndān ke bāre meñ mālūmāt hāsil ho jāeñ. Patā chalā ki us ke kaī lāyq rukn Jiliyād ke ilāqe ke shahr Yāzer meñ ābād hain. Yariyāh un kā sarparast thā. ³² Dāūd Bādshāh ne use Rūbin, Jad aur Manassī ke mashriqī ilāqe ko sañbhālne kī zimmedārī dī. Yariyāh kī is khidmat meñ us ke қhāndān ke mazīd 2,700 afrād bhī shāmil the. Šab lāyq aur apne apne қhāndānoñ ke sarparast the. Us ilāqe meñ wuh Rab ke ghar se mutalliq kāmoñ ke alāwā bādshāh kī khidmat bhī saranjām dete the.

27

Fauj ke Guroh

¹ Darj-e-zail un қhāndānī sarparastoñ, hazār hazār aur sau sau faujiyoñ par muqarrar afsaroñ aur sarkārī afsaroñ kī fahrist hai jo bādshāh ke mulāzim the.

Fauj 12 gurohoñ par mushtamil thī, aur har guroh ke 24,000 afrād the. Har guroh kī ጀyūṭī sāl

meñ ek māh ke lie lagtī thī. ² Jo afsar in gurohoñ par muqarrar the wuh yih the:

Pahlā māh: Yasūbiyām bin Zabdiyel. ³ Wuh Fāras ke ķhāndān kā thā aur us guroh par muqarrar thā jis kī ɖyūṭī pahle mahīne meñ hotī thī.

⁴ Dūsrā māh: Dodī Akhūhī. Us ke guroh ke ālā afsar kā nām Miqlot thā.

⁵ Tīsrā māh: Yahoyadā Imām kā beṭā Bināyāh.

⁶ Yih Dāūd ke behtarīn daste banām ‘Tīs’ par muqarrar thā aur khud zabardast faujī thā. Us ke guroh kā ālā afsar us kā beṭā ammīzabad thā.

⁷ Chauthā māh: Yoāb kā bhāī Asāhel. Us kī maut ke bād Asāhel kā beṭā Zabadiyāh us kī jagah muqarrar huā.

⁸ Pāinchwān māh: Samhūt Izrākhī.

⁹ Chhaṭā māh: Īrā bin Aqqīs Taqūī.

¹⁰ Sātwān māh: Ķhalis Falūnī Ifrāīmī.

¹¹ Āthwān māh: Zārah ke ķhāndān kā Sibbakī Hūsātī.

¹² Nawān māh: Binyamīn ke qabīle kā Abiyazar Anatotī.

¹³ Daswān māh: Zārah ke ķhāndān kā Mahrī Natūfātī.

¹⁴ Gyārhwān māh: Ifrāīm ke qabīle kā Bināyāh Fir'ātonī.

¹⁵ Bārhwān māh: Ģhutniyel ke ķhāndān kā Khaldī Natūfātī.

Qabīlon ke Sarparast

¹⁶ Zail ke ādmī Isrāīlī qabīlon ke sarparast the:

Rūbin kā qabīlā: Iliyazar bin Zikrī.

Shamāūn kā qabīlā: Safatiyāh bin Mākā.

¹⁷ Lāwī kā qabīlā: Hasbiyāh bin Qamuel. Hārūn ke ḥāndān kā sarparast Sadoq thā.

¹⁸ Yahūdāh kā qabīlā: Dāūd kā bhāī Ilihū. Ishkār kā qabīlā: Umri bin Mīkāel.

¹⁹ Zabūlūn kā qabīlā: Ismāyāh bin Abadiyāh. Naftālī kā qabīlā: Yarīmot bin Azriyel.

²⁰ Ifrāīm kā qabīlā: Hosea bin Azaziyāh. Maḡribī Manassī kā qabīlā: Yoel bin Fidāyāh.

²¹ Mashriqī Manassī kā qabīlā jo Jiliyād meñ thā: Yiddū bin Zakariyāh.

Binyamīn kā qabīlā: Yāsiyel bin Abinair.

²² Dān kā qabīlā: Azarel bin Yarohām.

Yih bārah log Isrāīlī qabiloñ ke sarbarāh the.

²³ Jitne Isrāīlī mardoñ kī umr 20 sāl yā is se kam thī unheñ Dāūd ne shumār nahīn kiyā, kyoñki Rab ne us se wādā kiyā thā ki maiñ Isrāiliyoñ ko āsmān par ke sitāroñ jaisā beshumār banā dūngā. ²⁴ Nīz, Yoāb bin Zarūyāh ne mardumshumārī ko shurū to kiyā lekin use iktitām tak nahīn pahuñchāyā thā, kyoñki Allāh kā ġħazab mardumshumārī ke bāis Isrāīl par nāzil huā thā. Natīje meñ Dāūd Bādshāh kī tārīkhī kitāb meñ Isrāiliyoñ kī kul tādād kabhī nahīn darj huī.

Shāhī Milkiyat ke Inchārj

²⁵ Azmāwat bin Adiyel Yarūshalam ke shāhī godāmoñ kā inchārj thā.

Jo godām dehī ilāqe, bāqī shahroñ, gāñwoñ aur qiloñ meñ the un ko Yūnatan bin Uzziyāh sañbhāltā thā.

²⁶ Azrī bin Kalūb shāhī zamīnoñ kī kāshtkārī karne wāloñ par muqarrar thā.

²⁷ Simāī Rāmātī angūr ke bāghoṇ kī nigarānī kartā jabki Zabdī Shifmī in bāghoṇ kī mai ke godāmoṇ kā inchārj thā.

²⁸ Bāl-hanān Jadīrī zaitūn aur anjīr-tūt ke un bāghoṇ par muqarrar thā jo mağhrib ke nashebī pahārī ilāqe meñ the. Yuās zaitūn ke tel ke godāmoṇ kī nigarānī kartā thā.

²⁹ Shārūn ke maidān meñ charne wāle gāy-bail Sitrī Shārūnī ke zer-e-nigarānī the jabki Sāfat bin Adlī wādiyoṇ meñ charne wāle gāy-bailoṇ ko sañbhāltā thā. ³⁰ Obil Ismāīlī ünṭoṇ par muqarrar thā, Yahadiyāh Marūnotī gadhiyoṇ par ³¹ aur Yāzīz Hājirī bheṛ-bakriyoṇ par.

Yih sab shāhī milkiyat ke nigarān the.

Bādshāh ke Qarībī Mushīr

³² Dāūd kā samajhdār aur ālim chachā Yūnatan bādshāh kā mushīr thā. Yihiyel bin Hakmūnī bādshāh ke beṭoṇ kī tarbiyat ke lie zimmedār thā. ³³ Akhītufal Dāūd kā mushīr jabki Hūsī Arkī Dāūd kā dost thā. ³⁴ Akhītufal ke bād Yahoyadā bin Bināyāh aur Abiyātar bādshāh ke mushīr ban gae. Yoāb shāhī fauj kā kamāndar thā.

28

Isrāīl ke Buzurgoṇ ke sāmne Dāūd kī Taqrīr

¹ Dāūd ne Isrāīl ke tamām buzurgoṇ ko Yarūshalam bulāyā. In meñ qabiloṇ ke sarparast, fauji ḍiwīzhanon par muqarrar afsar, hazār hazār aur sau sau faujiyoṇ par muqarrar afsar, shāhī milkiyat aur rewaṛoṇ ke inchārj, bādshāh ke beṭoṇ kī tarbiyat karne wāle afsar,

darbārī, mulk ke sūrmā aur bāqī tamām sāhib-e-haisiyat shāmil the.

² Dāūd Bādshāh un ke sāmne khaṛe ho kar un se muḥkātib huā,

“Mere bhāiyō aur merī qaum, merī bāt par dhyān deñ! Kāfī der se maiñ ek aisā makān tāmīr karnā chāhtā thā jis meñ Rab ke ahd kā sandūq mustaqil taur par rakhā jā sake. Ākhir yih to hamāre Khudā kī chaukī hai. Is maqsad se maiñ taiyāriyāñ karne lagā. ³ Lekin phir Allāh mujh se hamkalām huā, ‘Mere nām ke lie makān banānā terā kām nahīn hai, kyoñki tū ne jangjū hote hue bahut khūn bahāyā hai.’

⁴ Rab Isrāīl ke Khudā ne mere pūre khāndān meñ se mujhe chun kar hameshā ke lie Isrāīl kā bādshāh banā diyā, kyoñki us kī marzī thī ki Yahūdāh kā qabilā hukūmat kare. Yahūdāh ke khāndānoñ meñ se us ne mere bāp ke khāndān ko chun liyā, aur isī khāndān meñ se us ne mujhe pasand karke pūre Isrāīl kā bādshāh banā diyā.

⁵ Rab ne mujhe bahut beṭe atā kie hain. Un meñ se us ne muqarrar kiyā ki Sulemān mere bād takht par baiṭh kar Rab kī ummat par hukūmat kare. ⁶ Rab ne mujhe batāyā, ‘Terā beṭā Sulemān hī merā ghar aur us ke sahan tāmīr karegā. Kyoñki maiñ ne use chun kar farmāyā hai ki wuh merā beṭā hogā aur maiñ us kā bāp hūngā.

⁷ Agar wuh āj kī tarah āindā bhī mere ahkām aur hidāyat par amal kartā rahe to maiñ us kī bādshāhī abad tak qāym rakhūngā.’

⁸ Ab merī hidāyat par dhyān deñ, pūrā Isrāīl yāñī Rab kī jamāt aur hamārā Khudā is ke gawāh hain. Rab apne Khudā ke tamām ahkām ke

tābe raheñ! Phir āindā bhī yih achchhā mulk āp kī milkiyat aur hameshā tak āp kī aulād kī maurūsī zamīn rahegā. ⁹ Ai Sulemān mere beṭe, apne bāp ke Khudā ko taslīm karke pūre dil-o-jān aur khushī se us kī khidmat kareñ. Kyonki Rab tamām diloñ kī tahqīq kar letā hai, aur wuh hamāre khayaloñ ke tamām mansūboñ se wāqif hai. Us ke tālib raheñ to āp use pā leñge. Lekin agar āp use tark kareñ to wuh āp ko hameshā ke lie radd kar degā. ¹⁰ Yād rahe, Rab ne āp ko is lie chun liyā hai ki āp us ke lie muqaddas ghar tāmīr kareñ. Mazbūt rah kar is kām meñ lage raheñ!”

Rab ke Ghar kā Naqshā

¹¹ Phir Dāūd ne apne beṭe Sulemān ko Rab ke ghar kā naqshā de diyā jis meñ tamām tafsīlāt darj thīn yānī us ke barāmde, khazānoñ ke kamre, bālākhāne, andarūnī kamre, wuh Muqaddastarīn Kamrā jis meñ ahd ke sandūq ko us ke kaffāre ke dhakne samet rakhnā thā, ¹² Rab ke ghar ke sahan, us ke irdgird ke kamre aur wuh kamre jin meñ Rab ke lie makhsūs kie gae sāmān ko mahfūz rakhnā thā.

Dāūd ne Rūh kī hidāyat se yih pūrā naqshā taiyār kiyā thā. ¹³ Us ne Rab ke ghar kī khidmat ke lie darkār imāmoñ aur Lāwiyōñ ke gurohoñ ko bhī muqarrar kiyā, aur sāth sāth Rab ke ghar meñ bāqī tamām zimmedāriyān bhī. Is ke alāwā us ne Rab ke ghar kī khidmat ke lie darkār tamām sāmān kī fahrist bhī taiyār kī thi. ¹⁴ Us ne muqarrar kiyā ki mukhtalif chīzoñ ke lie kitnā sonā aur kitnī chāndī istemāl karnī hai. In meñ zail kī chīzeñ shāmil thiñ: ¹⁵ sone aur chāndī

ke charāghdān aur un ke charāgh (mukhtalif charāghdānoں ke wazn farq the, kyoंki har ek kā wazn us ke maqsad par munhasir thā), ¹⁶ sone kī wuh mezeñ jin par Rab ke lie mākhsūs rotiyān rakhnī thīn, chāndī kī mezeñ, ¹⁷ khālis sone ke kānṭe, chhirkāw ke katore aur surāhī, sone-chāndī ke pyāle ¹⁸ aur bakhūr jalāne kī qurbāngāh par mandhā huā khālis sonā. Dāūd ne Rab ke rath kā naqshā bhī Sulemān ke hawāle kar diyā, yānī un karūbī farishton kā naqshā jo apne paroں ko phailā kar Rab ke ahd ke sandūq ko dhānp dete haiñ.

¹⁹ Dāūd ne kahā, “Maiñ ne yih tamām tafsīlāt waise hī qalamband kar dī haiñ jaise Rab ne mujhe hikmat aur samajh atā kī hai.”

²⁰ Phir wuh apne bete Sulemān se mūkhātib huā, “Mazbūt aur diler hoñ! Dareñ mat aur himmat mat hārnā, kyoंki Rab Khudā merā Khudā āp ke sāth hai. Na wuh āp ko chhoṛegā, na tark karegā balki Rab ke ghar kī takmīl tak āp kī madad kartā rahegā. ²¹ Khidmat ke lie muqarrar imāmoں aur Lāwiyoں ke guroh bhī āp kā sahārā ban kar Rab ke ghar meñ apnī khidmat saranjām deñge. Tāmīr ke lie jitne bhī māhir kārīgaroں kī zarūrat hai wuh khidmat ke lie taiyār khaṛe haiñ. Buzurgoں se le kar ām logoں tak sab āp kī har hidāyat kī tāmīl karne ke lie musta'id haiñ.”

29

Rab ke Ghar kī Tāmīr ke lie Nazarāne

¹ Phir Dāūd dubārā pūrī jamāt se mūkhātib huā, “Allāh ne mere bete Sulemān ko chun kar

muqarrar kiyā hai ki wuh aglā bādshāh bane. Lekin wuh abhī jawān aur nātajrabākār hai, aur yih tāmīrī kām bahut wasī hai. Use to yih mahal insān ke lie nahīn banānā hai balki Rab hamāre Khudā ke lie. ² Main pūrī jāñfishānī se apne Ḳhudā ke ghar kī tāmīr ke lie sāmān jamā kar chukā hūn. Is meñ sonā-chāndī, pītal, lohā, lakaṛī, aqīq-e-ahmar, * mukhtalif jaṛe hue jawāhar aur pachchīkārī ke mukhtalif patthar barī miqdār meñ shāmil haiṇ. ³ Aur chūnki mujh meñ apne Ḳhudā kā ghar banāne ke lie bojh hai is lie maiṇ ne in chīzoṇ ke alāwā apne zātī khazānoṇ se bhī sonā aur chāndī dī hai ⁴ yānī taqrīban 1,00,000 kilogrām khālis sonā aur 2,35,000 kilogrām khālis chāndī. Maiṇ chāhtā hūn ki yih kamroṇ kī dīwāroṇ par charhāī jāe. ⁵ Kuchh kārīgaroṇ ke bāqī kāmoṇ ke lie bhī istemāl ho saktā hai. Ab maiṇ āp se pūchhtā hūn, āj kaun merī tarah khushī se Rab ke kām ke lie kuchh dene ko taiyār hai?”

⁶ Yih sun kar wahān hāzir khāndānī sarparastōn, qabiloṇ ke buzurgoṇ, hazār hazār aur sau sau faujiyōn par muqarrar afsaroṇ aur bādshāh ke ālā sarkārī afsaroṇ ne khushī se kām ke lie hadiye die. ⁷ Us din Rab ke ghar ke lie taqrīban 1,70,000 kilogrām sonā, sone ke 10,000 sikke, 3,40,000 kilogrām chāndī, 6,10,000 kilogrām pītal aur 34,00,000 kilogrām lohā jamā huā. ⁸ Jis ke pās jawāhar the us ne unheṇ Yihiyel Jairsonī ke hawāle kar diyā jo khazāñchī thā aur jis ne unheṇ Rab ke ghar ke khazāne meñ mahfūz kar liyā. ⁹ Pūrī qaum is farākhdilī ko

* **29:2** carnelian

dekh kar қhush huī, kyoñki sab ne dilī қhushī aur faiyāzī se apne hadiye Rab ko pesh kie. Dāūd Bādshāh bhī nīhāyat қhush huā.

Dāūd kī Duā

¹⁰ Is ke bād Dāūd ne pūrī jamāt ke sāmne Rab kī tamjīd karke kahā,

“Ai Rab hamāre bāp Isrāīl ke Қhudā, azal se abad tak terī hamd ho. ¹¹ Ai Rab, azmat, qudrat, jalāl aur shān-o-shaukat tere hī hain, kyoñki jo kuchh bhī āsmān aur zamīn meñ hai wuh terā hī hai. Ai Rab, saltanat tere hāth meñ hai, aur tū tamām chīzoñ par sarfarāz hai. ¹² Daulat aur izzat tujh se miltī hai, aur tū sab par hukmrān hai. Tere hāth meñ tāqat aur qudrat hai, aur har insān ko tū hī tāqatwar aur mazbūt banā saktā hai. ¹³ Ai hamāre Қhudā, yih dekh kar ham terī satāish aur tere jalālī nām kī tārif karte hain.

¹⁴ Merī aur merī qaum kī kyā haisiyat hai ki ham itnī faiyāzī se yih chīzeñ de sake? Ākhir hamārī tamām milkiyat terī taraf se hai. Jo kuchh bhī ham ne tujhe de diyā wuh hameñ tere hāth se milā hai. ¹⁵ Apne bāpdādā kī tarah ham bhī tere nazdīk pardesi aur ġhairshahrī hain. Duniyā meñ hamārī zindagī sāy kī tarah ārizī hai, aur maut se bachne kī koi ummīd nahīn. ¹⁶ Ai Rab hamāre Қhudā, ham ne yih sārā tāmīrī sāmān is lie ikaṭṭhā kiyā hai ki tere muqaddas nām ke lie ghar banāyā jāe. Lekin haqīqat meñ yih sab kuchh pahle se tere hāth se hāsil huā hai. Yih pahle se terā hī hai. ¹⁷ Ai mere Қhudā, maiñ jāntā hūn ki tū insān kā dil jāñch letā hai, ki diyānatdārī tujhe pasand hai. Jo kuchh bhī maiñ ne diyā hai wuh maiñ ne қhushī se aur

achchhī nīyat se diyā hai. Ab mujhe yih dekh kar khushī hai ki yahān hāzir terī qaum ne bhī itnī faiyāzī se tujhe hadiye die hain.

¹⁸ Ai Rab hamāre bāpdādā Ibrāhīm, Is'hāq aur Isrāīl ke Khudā, guzārish hai ki tū hameshā tak apnī qaum ke dilon meñ aisī hī tarap qāym rakh. Atā kar ki un ke dil tere sāth lipte raheñ. ¹⁹ Mere bete Sulemān kī bhī madad kar tāki wuh pūre dil-o-jān se tere ahkām aur hidāyāt par amal kare aur us mahal ko takmīl tak pahuñchā sake jis ke lie maiñ ne taiyāriyān kī hain.”

²⁰ Phir Dāūd ne pūrī jamāt se kahā, “Āeñ, Rab apne Khudā kī satāish karen!” Chunānche sab Rab apne bāpdādā ke Khudā kī tamjīd karke Rab aur bādshāh ke sāmne muñh ke bal jhuk gae.

²¹ Agle din tamām Isrāīl ke lie bhasm hone wālī bahut-sī qurbāniyān un kī mai kī nazaroñ samet Rab ko pesh kī gaīn. Is ke lie 1,000 jawān bailoñ, 1,000 mendhoñ aur 1,000 bher ke bachchoñ ko charhāyā gayā. Sāth sāth zabah kī beshumār qurbāniyān bhī pesh kī gaīn. ²² Us din unhoñ ne Rab ke huzūr khāte-pīte hue barī khushī manāi. Phir unhoñ ne dubārā is kī tasdiq kī ki Dāūd kā betā Sulemān hamārā bādshāh hai. Tel se use masah karke unhoñ ne use Rab ke huzūr bādshāh aur Sadoq ko imām qarār diyā.

Sulemān kī Zabardast Hukūmat

²³ Yoñ Sulemān apne bāp Dāūd kī jagah Rab ke takht par baiñ gayā. Use kāmyābī hāsil huī, aur tamām Isrāīl us ke tābe rahā. ²⁴ Tamām ālā afsar, bare bare faujī aur Dāūd ke bāqī betoñ ne bhī apnī tābedārī kā izhār kiyā. ²⁵ Isrāīl ke dekhte dekhte Rab ne Sulemān ko bahut sarfarāz kiyā.

Us ne us kī saltanat ko aisī shān-o-shaukat se nawāzā jo māzī meñ Isrāīl ke kisī bhī bādshāh ko hāsil nahīn huī thī.

Dāūd kī Wafāt

²⁶⁻²⁷ Dāūd bin Yassī kul 40 sāl tak Isrāīl kā bādshāh rahā, 7 sāl Habrūn meñ aur 33 sāl Yarūshalam meñ. ²⁸ Wuh bahut umrrasīdā aur umr, daulat aur izzat se āsūdā ho kar intaqāl kar gayā. Phir Sulemān taqhtnashīn huā.

²⁹ Bāqī jo kuchh Dāūd kī hukūmat ke daurān huā wuh tīnoń kitāboń ‘Samuel Ḍhaibbīn kī Tārīkh,’ ‘Nātan Nabī kī Tārīkh’ aur ‘Jād Ḍhaibbīn kī Tārīkh’ meñ darj hai. ³⁰ In meñ us kī hukūmat aur asar-o-rasūkī kī tafsīlāt bayān kī gaī haiń, nīz wuh kuchh jo us ke sāth, Isrāīl ke sāth aur gird-o-nawāh ke mamālik ke sāth huā.

**Kitab-i Muqaddas
The Holy Bible in Urdu, Urdu Geo Version, Roman
Script**

copyright © 2019 Urdu Geo Version

Language: (Urdu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-05-06

PDF generated using Haiola and XeLaTeX on 11 Nov 2022 from source files dated 7 May 2022

123ff8cb-27b3-5817-a02a-22e67145fd30